

## DXUS YUWE SAN MARKOS FXI'JNI

*Juan Bautista nasa u'pnimée kiwesu Dxus yuwe's pta'sxni*

*(Mt 3.1-12; Lk 3.1-9, 15-17; Jn 1.19-28)*

<sup>1</sup> Dxus Nçxi'k Jesukristo fxi'zeni's pta'sxnisa na'wêk takh: <sup>2</sup> Txãniitey Dxus yuwe pta'sxsa Isaiasa' na'jĩnaga fxi'j Dxus we'weni's:

Teeçx adx yuwe pta'sxsa's kajaçthu iidx yaçte, iidx dxi'ja's pheu'khan.

<sup>3</sup> Nasa u'pnimée kiwesu sus we'wenik pthũuse' na'jĩna:

Dxus pa'jwa'ja's mpheujwe, dxi'ja's ku'le phaadena jĩ'k.

<sup>4</sup> Txã'wê Isaias we'weni kxtey yuuwa'j ãhte', Juana' nasa u'pnimée kiwesu vxyaak nasatx bautisãyna. Sa' na'jĩnak pta'sxi':

—Pkaltxi nvxihtçxa Dxus tasxte misxawedwe, yu'te ya'bautisãyna, kxah i'kwe'sxtxi' Dxusa' pel-tunaĩna.

<sup>5</sup> Juan we'weni's wēsē'jya' pa'jtx Judea kiwesuwe'sx vxite' Jerusalenuwe'sxwa. Sa' pkalsatha'w jĩna Dxusa's perdon pējxna pa'jsatxi' Juana' Jordan yu'walate bautisaĩ'k.

<sup>6</sup> Juana' kamelxo khas atxh athçxa kha'txku jxtudu', sa' txajx ũ'nisa yu' khã'sx wala çxhi'dx miltxi yu'. <sup>7</sup> Sa' Dxus yuwe's na'jĩnak pta'sxi' nasatx:

—Adx e'suh teeçx yuja' txã' adxte jxthaakwe ãjãwa'jsa'. Adxa' txajx pelgatxi wesçxáa

yuhtxwa khihbxa' ãjãwa'jmeesath. <sup>8</sup> Adxa' i'kwe'sxtxi' yu' yakhçxáath bautisãyya' ãjã', naapkaçxha' txã' i'kwe'sx ũuste Dxus Espiritu's kxu'akhe'jya' ãjãwa'jsa' jĩ'k.

*Jesus ya'bautisãyni*  
(Mt 3.13-17; Lk 3.21-22)

<sup>9</sup> Txãn ensu' Jesusa' Nasaret çxhabu kasejk Galilea kiweju. Sa' Juan tasxte pa'the', Jordan yu'walate bautisãyku. <sup>10</sup> Aça' yu'ju kasejeççxa', uyku cielu phaateçte. Naapkaçxha' Espiritu' tub çxihme na'wësa txajx kajkwekhẽ kĩaçtek uy. <sup>11</sup> Sa' cieluju teeçx na'jĩna we'weniwa pthũusek:

—Idxa' adx Nçxi'k wala wedxnisag. Iidxpaga wala weçxana ũsthu jĩk.

*Eçxthê'j Jesusa's ĩsxii wëeni*  
(Mt 4.1-11; Lk 4.1-13)

<sup>12</sup> Txãa dudtey Espiritu' Jesusa's pe'jna u'kh nasa u'pnimée kiwesu. <sup>13</sup> Aça' Jesusa' kuarenta enku kxtee u'pu' yu'kh niimal ksxavxyte. Kxtee u'pte', eçxthê'ja' pa'kh ewmée vxit wëeçxa. Aça' txãa e'su' Dxus angeleswe'sxwa pa'jtx pu'çxya'.

*Galilea kiwesu Jesus mjũiya' takhni*  
(Mt 4.12-17; Lk 4.14-15)

<sup>14</sup> Juana's karcelte kxuuphni e'su', Jesusa' Galilea kiwen u'kh Dxus jxkaahwa'ja's pta'sxya'.

<sup>15</sup> Sa' na'jĩnak pta'sx:

—Ena' ãjãça'. Dxus jxkaahwa'j ena' utxa ũsa'. Aça' i'kwe'sxa' pkaltxi nvxihtçxa Dxus tasxte mixawedwe, sa' Dxus yuwe ewte nvxiitwa'jsa's ũuste myu'akhwe jĩ'k.

*Wedx uwesáa pahzsatx Jesus pa'yani*  
(Mt 4.18-22; Lk 5.1-11)

<sup>16</sup> Txáa e'su' Jesusa' Galilea ìkh wala pukasu u'jweçça', uyku pxakhsatx Simon Adreswe'sxtxi. Txáawe'sxa' wedx uwesaatx yu', txáasatx wedx ukhe's ìkh walate akhna ũsu'. <sup>17</sup> Aça' Jesusa' pa'yak:

—Adx yakh myuhwe, aça' i'kwe'sxtxi' Dxus jïi nasaa pkhakhwa'jsa vxitu'nja. <sup>18</sup> Txã'jïçpkaçxa', txáawe'sxa' wedx ukhe's nvxihtna' Jesus yakh u'jtx.

<sup>19</sup> Txajũ' Jesusa' ki' u'jçxa', Zebedeo nçxi'kwe'sx pxakhsatxku uy, Jakobo Juanwe'sxtxi. Txáawe'sxa' wedx ukhe's pã'khnatx u'p yu' barkote. <sup>20</sup> Aça' pa'yak. Naapkaçxa' txáawe'sxa' ney Zebedeo's vxite pu'çxa yakh barkote nvxihtna', Jesus yakh u'jtx.

*Eçx iiyamunisa*  
(Lk 4.31-37)

<sup>21</sup> Txajũ' Kapernaum çxhabte pa'jçxa', Jesusa' kaapiya'jya' takhku sapatu jxkaase ensu judiuwe'sx pkhaakhenite. <sup>22</sup> Aça' Jesus kaapiya'jni's wēsē'jçxa', nasa' wala kuh yajkxna neeyũutx, txã'wē leya's kaapiya'jsawe'sx na'wēmée, nwēese'jwa'ja's ũukhnus we'wena kaapiya'pha'ga.

<sup>23</sup> Txáa pkhaakheni yatte teeçx piçthē'j eçx iiyamunisak ũsu', sa' na'jïnak sus we'we:

<sup>24</sup> —Jesus, Nasarethuwe'sx, kwe'sxtxi' çkîh ya'waga? ¿Ivxiituya' wá'ga yuwé'? Idx kimtewa jïith. Idxa' Dxus kaahnisag jïte', <sup>25</sup> Jesusa' na'jïnak ũusçxa we'we txáa eçxa's:

—Sxuuna' myũu, sa' naa piçthẽ'j ũusu mkaaseh jĩna jxkaathe', <sup>26</sup> txãa eçxa' nasa's kaywẽçxa'jna juuna' kweeyi'jçxa kasejk. <sup>27</sup> Txã'wẽ yũute', nasa' jxukaysa ũukhçxa na'wẽtx puutx paapëyi':

—Naa piçthẽ'ja' ¿kimna? Txajx we'weni' ¿kihtxki açki'tx eçx yuhwa nwẽesẽ'je'? jĩ'tx.

<sup>28</sup> Jesus txã'wẽ yũuni's wala dud jiyutx Galilea kiwesuwe'sx jxuka.

*Pedro nyu njĩ'ja's Jesus nuykatxhini*

*(Mt 8.14-15; Lk 4.38-39)*

<sup>29</sup> Txajũ' judiuwe'sx pkhaakheni yatu kasehçxa', Simon Adreswe'sx yatnak u'j, Jakobo Juan yakh. <sup>30</sup> Aça' kxtee yu' Simon nyu njĩ'ja' kakwesektek açã'na ũsu'. Aça' Jesusa's pta'sxtxi txã'wẽ açã'sa ũsa' jĩna. <sup>31</sup> Txajũ' Jesusa' kũhçxa kuseju pu'kisku, naapkaçxha' dudtey kakweseka' ũçxhak. Txajũ' kiiteçxa selpiiya' kasejk.

*Jxuka çxhi'dxiçte maazkuẽesatxwa nuykatxhini*

*(Mt 8.16-17; Lk 4.40-41)*

<sup>32</sup> Txajũ' çxhi'dxna kĩaçte', jxuka açã'satx Jesus tasxte nuypa'jtx vxite' eçx luuku vxitnisatxwa. <sup>33</sup> Aça' çxhabte nasa' jxuka kũhtx vxitxte thegya'. <sup>34</sup> Txajũ' Jesusa' nuykatxhik fxiyfxiy wee ji'phsatxwa, sa' eçx luuku vxit-satxwa wala kutxi'kh nasaa ũusu. Txãa eçxa' Jesus kimtewa jiitx yu' nawa kwe'we'jme'.

*Galileasu Dxus yuwe's Jesus pta'sxni*

*(Lk 4.42-44)*

<sup>35</sup> Txã'wê yũuni khikhiiçte nee çxhi'dxtey, Jesusa' Dxus yakh puutx we'weya' u'kh çxhab ekaju. <sup>36</sup> Aça' Simona' vxite yakh Jesusna pakweya' u'kh. <sup>37</sup> Sa' uyçxa' pta'sxku:

—Jxukaysa idxa's jxpeejxta' jïtewa, <sup>38</sup> Jesus pasçxa':

—Ay utxasuwe'sx vxitewa peejxta' Dxus yuwe ewsa's, aça' kxsü u'jwega. Txã'wê pta'sxna pekũjxa' iïçxáath naa kiwete kïh jïk.

<sup>39</sup> Sa' eçx iiyamuçxa luuku vxit-satx nasaa ũusu kutxi'jna Galilea kiwesu jxuka pekũjk Dxus yuwe's pta'sxna, vxite' judiuwe'sx pkhaakhenisuwa.

*Teeçx piçthê'j wã'jy weete ãçã'sa's Jesus nuykatxhini*

*(Mt 8.1-4; Lk 5.12-16)*

<sup>40</sup> Txãn ensu' teeçx piçthê'j wã'jy wee seena' kazxsate ãçã'sa Jesus tasxte peejxükweçxa na'jïk:

—Adxa's nuykatxhiwá'ga ahçemeeçxa' jïna pxthaa we'wete', <sup>41</sup> Jesusa' peeygãhna kuseju jxa'dxçxa':

—Ahçeme'nja, naa pa'ga katxhiçxa mneeyũu jïçpkaçxa', <sup>42</sup> txãa wã'jy weeju katxhiçxak neeyũu.

<sup>43</sup> Txajũ' Jesusa' txãa piçthê'ja's wala neewe'weçxa kaakh na'jïna:

<sup>44</sup> —Adx we'wenitxi' jxpa'yakçxa, maa yuhtxwa pta'sxmeene'ga, naasáa sacerdotexá's iidx kakwe's txwesya' me'j. Sa' txãa weeju katxhipa'ga Dxusna peesune'ga Moises ma'wêga jxkaah txã'wêy, kxah nasa jxukaysa jiyutxna

idx ew katxhiçxa neeyūutewa jīnak neewe'we.  
<sup>45</sup> Nawa txāa piçthē'ja' nasa jxukaysatx pta'sxku,  
 Jesus ma'wē yūuni'swa jxuka. Txāa pa'gaçxāa  
 Jesusa' maa çxhabte yuhwa āate pa'jya'  
 ājāmeeçxa', çxhab ekaju nasa meesuçxāak  
 u'ju'. Makwe txā'wē yūutewa, txajx tasxte yu'  
 majūwe'sxwa pa'jna nestxi yu'.

## 2

### *Esēya' ājasame's Jesus nuykatxhini* (Mt 9.1-8; Lk 5.17-26)

<sup>1</sup> Maz en skhēwniijū' Jesusa' ki'kin pa'kh  
 Kapernaum çxhabte. Aça' nasa jiyutx Jesusa'  
 pa'jçxa teeçx yatte ūsa' jīni's. <sup>2</sup> Txāasatx  
 naa dudte nasa wala pkhaakheçxa yat vxitxte  
 jxuka uta, aça' Jesusa' Dxus yuwe's pta'sxku.  
<sup>3</sup> Naapkaçxha' pahz piçthē'jsa teeçx ēsēya'  
 ājāsameea's yakhçxatx Jesus tasxte nuypa'j.  
<sup>4</sup> Nawa nasaa ksxavxyte Jesus tasxte kuutxa'jya'  
 ājāmeeçxa', yat kajkweju phaadeçxatx Jesus  
 ūsnikhē nuykīh aadasga khikhçxa. <sup>5</sup> Txajū'  
 āçā'sa's nuypa'jsawe'sxa' Jesusa' nuykatxhiyu-  
 juna sūhni's jiyuçxa', txāa āçā'sa's we'wek Je-  
 susa':

—Iidx pkala' peltunāyni yā'jtx neeyūu jīte',  
<sup>6</sup> Dxus leya's kaapiya'jsawe'sx wēsē'jna u'psa  
 maai yu' na'wēttx yajkx:

<sup>7</sup> —¿Ma'wēçxaga naa piçthē'ja' txā'wē we'we'?  
 Dxus yuuçxāa pkaltxi peltunāyya' ājawa'jsa',  
 aça' jweeju yu' ¿kimçxá' peltunāyya' ājāma'k?  
 Aça' Dxusa's iiveeçx we'wena ūsa' sūjū'tx.

8 Nawa Jesusa' txãawe'sx yaakxni's jiyuça na'jĩk:

—¿Kĩh yuutekwe txã'wẽ yaaki'? <sup>9</sup> ¿Maa thēyeesakx? Iidx pkala' peltunāyñi yã'jtx neeyũ ¿jĩniá'? Meeçxa': Kiiteçxa iidx deeni's tu'sçxa me'j ¿jĩniá'? <sup>10</sup> Makwe thēysatewa Dxus Nçxi'k Nasa Yuusa' naa kiwete pkaltxi peltunāyña' ajāwa'jsa' naa pa'ga kaajiyu'jya'wath açxha'. Txajũ' açã'sa's na'jĩk: <sup>11</sup> Idxasthu we'we': Kiiteçxa iidx deeni's tu'sçxa yatna me'j jĩçpkaçxha', <sup>12</sup> açã'sa' dudtey kiitena'wa txajx deeni's tu'sçxa u'kh, nasa thegna ũsiyna.

Txajũ' jxukaysa wala kuh yajxna Dxusna weçxana na'jĩ'tx:

—Bagaçx yuhwa na'wẽ yũuni yu's iuymeetha'w jĩ'tx.

*Mateo's Jesus pa'yani*  
(Mt 9.9-13; Lk 5.27-32)

<sup>13</sup> Txãa e'su' Jesusa' ki' u'kh ìkh wala pukan. Aça' txajx tasxte nasa wala pkhaakhete', Dxus yuwe's kaapiya'kh. <sup>14</sup> Txãajũ ki' u'jçxa', Alfexo nçxi'k Levxia'sku uy, gobierno jĩ vxyu pkhakhna u'pte. Sa':

—Adx yakh myuh jĩna pa'yaçpkaçxha', Levxia' kiitena' Jesus yakh u'kh.

<sup>15</sup> Txajũ' Jesusa' txãa yakh u'jusawe'sx yakh Levxi yatte ũ'ya' u'kate', gobierno jĩ vxyu pkhaksawe'sx vxite' pkalsawe'sxwa wala kuhsa pkhaakheçxa' Jesus yakh mesate ũ'ya' kaçxtxi. <sup>16</sup> Aça' Dxus leya's kaapiya'jsawe'sx vxite' fxariseowe'sxa' Jesusa' nasa txã'wẽsa ksxavxyte u'pte uyçxa', pějxtxi Jesus yakh u'jusawe'sxtxi:

—I'kwe'sxtxi kaapiya'jsa ¿ma'wěçxaga gobierno jĩi vxyu pkhaksawe'sx vxite' pkalsawe'sx yakh ũ'wé'? jĩte', <sup>17</sup> txã'wě pëyiçte Jesus wēsē'jçxa' na'jĩk:

—Yu'çe'jsa's jxpeejxmeeta' aka ji'phmée wēt ũssa', naasáa ãçã'sa yuuçxáa yu'çe'jsa's jxpeejxta'. Adxa' naa kiwete nasa ewsatx pakweya' kĩhmeeth, pkalsatx pakweya'çxáath kĩh jĩk.

*Yūunani's Jesusa's pēyni*  
(Mt 9.14-17; Lk 5.33-39)

<sup>18</sup> Teeçx ente', Juan yakh u'jusa vxite' fxariseowe'sx yakh u'jusa txã'wě yūunaana ũste', nasa' paapējxtxi Jesusa's:

—¿Juan yakh u'jusa vxite' fxariseowe'sx yakh u'jusawe'sxa' yūuna'tx, açá' idx yakh u'jusawe'sx yu' ¿kĩh yuuçxata yūuna'çmée? jĩte', <sup>19</sup> Jesusa' na'wěk kaaja'da'jna pas:

—¿Novxiowe'sx kaba ente pi'kxnisa' yūunaaya' ãjãma'tx? novxio txãawe'sx yakh nee ũsiite'. Kabani fxiesta pçumeyte', yūunaaya' ãjãmeetxna. <sup>20</sup> Nawa novxio' txãawe'sx tasxu txuteewa'j en pa'jana, txãjũ isa yūunaatxna.

<sup>21</sup> Ropa ñisx suteniite, tela u'sesa yakh ya'pã'khe'çme'. Txã'wěme', tela u'sesa' jweeĩçxáak sude' ñisxsa's. <sup>22</sup> Txã'wěy beka u'se aahnisa's slun ñisxsate ya'awu'çme'. Txã'wěme', beka u'sesa' slun ñisxsa's sude'k, açá' beka yakh slun yakh e'zĩ vxitu'tx. Txãa pa'ga beka u'sesa's slun u'sesate awwa'ja' jĩk.

*Jxkaase entewa skuutxhtxi çxuktedeçxa ũ'ni*  
(Mt 12.1-8; Lk 6.1-5)



<sup>23</sup> Teeçx sapatu jxkaase ente', Jesusa' skuutxh ehsuk skhëw. Aça' txãa yakh u'jusawe'sxa' sku-utxhtxi çxuktedeçxa ü'tx. <sup>24</sup> Aça' fxariseowe'sxa' na'wëtx pëjx:

—¿Uyu'gá' idx yakh u'jusawe'sxa' ma'wëçxata mjïi en meetewa txã'wë yũ'? jïte', <sup>25</sup> Jesusa' na'wëk pas:

—I'kwe'sxa' Dxus librute iilëeymeewá'kwe Davxida' ¿kîhga yuu? txãa yakh pi'kxna u'jusawe'sx yakh teeçx ente' wëeçxa'. <sup>26</sup> Sacerdote npiiçthë'j Abiatar ente' dxuus yatte u'kaçxa, kxtee pantxi ü'k, sa' txãa yakh u'jusatxwa üsu'sku. Txãa pana' naasáa sacerdotewe'sxçxáa ü'wa'the jiiçxawa txã'wëk yũu.

<sup>27</sup> I'kwe'sxa' mjiyuwe: Jxkaase ena' nasatx selpiwa'jsa íçxá', nawa suwwa'jsa yu' me'. <sup>28</sup> Txãa pa'ga Dxus Nçxi'k Nasa Yuusa' jxkaahwa'j ji'pha' makwe sapatu jxkaase entewa jîk.

### 3

#### *Teeçx piçthë'j txajx kuse udxnisa (Mt 12.9-14; Lk 6.6-11)*

<sup>1</sup> Vxite sapatu ente' Jesusa' ki'kin judiuwe'sx pkhaakheni yatte u'kak. Aça' kxte' teeçx piçthë'j teeçx kuse udxnisa këese'jya' äjäsameek u'p yu'. <sup>2</sup> Aça' fxariseowe'sxa' Jesusa's peethegu'natx üsu', sapatu jxkaase ente nuykatxhite' pãatxhî'khya' sühçxa.

<sup>3</sup> Txajũ' Jesusa' txãa piçthë'ja's pa'yaçxa nasaa pxãhte kxuuju'jçxa', <sup>4</sup> na'wëk paapëjx vxite kx-tee üssatx:

—Sapatu jxkaase entewa pu'çxte ¿ewmanx? meeçxa' ¿pu'çxwa'jmeemanx? Nasa's nwe'wete ¿ewmanx? meeçxa' nwe'wemeete ¿ewmanx? jĩte', txãawe'sxa' pasmée sxuuna'tx neeyũu.

<sup>5</sup> Txã'wẽ fxariseowe'sxa' Jesus we'weni's jxpa'gaya' wa'lte', Jesusa' txãawe'sxtxi ũusçxa thegçxa na'jĩnak we'we txãa piçthẽ'j kuse udxnisa's:

—Kuse's mku'le'j jĩçpkaçxha', txajx kuse' ewuuk.

<sup>6</sup> Txajũ' fxariseowe'sxa' Jesusa's ikhya' puutx we'weya' u'jtx Herodes ju'gsawe'sx yakh.

### *Nasa wala kuh pehnatx ìkh pukasu*

<sup>7</sup> Naapkaçxha' Jesusa' txãa yakh u'jusawe'sx yakh u'kh ìkh wala pukan. Aça' Galileaju nasa wala kuh u'jtx Jesus e'stey. <sup>8</sup> Txã'wẽ Jesus kĩjkĩhwa ew yũuni's nasa jiyuçxa', majũwe'sxwa Jesus tasxte pa'jtx thegya', Judeajuwe'sx, Jerusalenuwe'sx, Idumeajuwe'sx, Jordan yu'wala kutejuwe'sx, vxite' Tiro, Sidon çxhab peeku'juwe'sxwa. <sup>9-10</sup> Nasa txã'wẽ wala pa'the', maazkuẽe açã'satxwa nuykatxhik, aça' jxukaysa Jesusa's kpaajxa'dxçxa katxhi wẽesa txajx tasxteçxaçxáa utxaaçxa akaaçxpçxãhtx yuuna ũsu'. Txãa pa'gak Jesusa' txãa yakh u'jusawe'sxtxi jxkaah teeçx barko ih ji'phukahñ akaaçxhiçte kxtee khẽewa'j. <sup>11</sup> Aça' eçx iiyamunisawe'sxa' Jesusa's uyçxa, txajx tasxte peejxũkwena na'jĩnatx we'we':

—Idxa' Dxus Nçxi'kgu jĩte', <sup>12</sup> Jesusa' txãawe'sxtxi' wala juuna' we'wek kimtewa ãate kaajiyu'khamen.

*Doce nasa Jesus txhitxhni**(Mt 10.1-4; Lk 6.12-16)*

<sup>13</sup> Txãa e'su' Jesusa' thã'the u'kh kuh nasatx pi'kxçxa.

<sup>14</sup> Aça' kxtee kãhçxa', doce nasatx txhitxhku txãa yakh u'juwa'jsa, txãawe'sxtxi' Dxus yuwe's pta'sxya' kaajxa'. <sup>15</sup> Txã'wẽ txhitxhçxa', ãçã'satxwa nuykatxhina eçx luuku vxit-satxwa ùusu kutxi'jya' ãjãwa'ja's ùsku.

<sup>16</sup> Txãa doce nasa' na'wẽ yaasete': Simon, txã'sa' Pedro yasek ki'p. <sup>17</sup> Vxite' Zebedeo nçxi'kwe'sx pxakhsa Jakobo Juanwe'sxtxi' yu'. Txãa pxakhtxi' Boanerges jĩnatx kxsuus', nasa juuna'sa pa'ga. <sup>18</sup> Vxite' Andrés, Fxelipe, Bartolomé, Mateo, Tomás, Alfxeo nçxi'k Jakobo, Tadeo, vxite' Simón kananista nasa, <sup>19</sup> vxite' Judas Iskariote, Jesusa's açesawe'sx kusete dukhwa'jsa.

Jesusa' thã'ju sxawedçxa', teeçx yattek u'ka, txajx txhitxhnisawe'sx yakh.

*Dxus Espiritu's açewe'weni**(Mt 12.22-32; Lk 11.14-23; 12.10)*

<sup>20</sup> Txã'wẽy nasa iiméh wala kuh pkhaakhete', ù'wa'j en yuhwa ji'phumeeta'.

<sup>21</sup> Txajũ' Jesus nwe'sxa' txã'wẽ yũuni's jiyuçxa', Jesusa' luuku yuune' sũhçxa pe'jna u'jya' pa'jtx. <sup>22</sup> Aça' Dxus leya's kaapiya'jsawe'sxwa Jerusalenu pa'jçxa' na'jĩ'tx:

—Naa piçthẽ'ja' eçxthẽ'ja's yuu ùuste ji'pha'. Txã'wẽçxa'ik eçxtxi nasaa ùusuh kutxi'jya' ãjã' jĩte', <sup>23</sup> Jesusa' nasatx pa'yaçxa na'wẽk pta'sx jiyukahn:

—¿Ma'wēçxa eçxthē'ja' eçxthē'ja's íçxáa kutxi'jya' ãjã'kx? <sup>24</sup> Maa kiwetewa gobierno' peekx nasatx íçxáa ahçeçxa puiiçxa', çxhãçxhameena. <sup>25</sup> Txã'wēy teeçx yattewe'sxwa puutx yahçena puiiçxa', pçuutxna puutx uuna. <sup>26</sup> Aça' txã'wēy eçxthē'jwa txajx jxkaahnisa eçx yakh íçxáa puiiçxa', çxhãçxhamée puutx pçuutxna.

<sup>27</sup> Kim yuhwa ewteçxah yu' nkuusa'jya' ãjãmeetxna, yat namu khuē'ya's tudmeeçxa yu'. Aça' txã'wē tudçxa yuuçxáa nkuusa'jya' ãjãtxna.

<sup>28</sup> I'kwe'sxa' mpa'yajkxwe: Nasa naa kiwete kīhwa ewmée yūuni kīhwa Dxusna ewmée nuywe'wetewa txāatxi' jxuka ya'peltunaīna. <sup>29</sup> Nawa Dxus Espiritu's açewe'wete', bagaçxte yuhwa peltunāynimée yuuna, uu kiwen kaahwa'jçxáa nvxiituna jīk. <sup>30</sup> Nasa we'weçxa': Eçxthē'ja's ũuste ji'pha' jīpa'gak txã'wē pta'sx Jesusa'.

*Jesus njī'j vxite' txajx nyakhwe'sx  
(Mt 12.46-50; Lk 8.19-21)*

<sup>31</sup> Naapkaçxha' pa'jtx Jesus njī'j vxite' nyakhwe'sx jxuka. Sa' ekate kūhçxa, Jesusa's pa'yakaahxtx. <sup>32</sup> Aça' Jesus yakh dxiite u'psa' pta'sxtxi na'jīna:

—Iidx mama iidx nyakhwe'sx pa'jçxa ekate ũsta', sa' idxa'stxi yuukaja' jīte', <sup>33</sup> Jesusa' na'wēk pas:

—¿Kimtxikwe adx mama adx nyakhwe'sx jīna we'wé'? <sup>34</sup> Sa' txã'wē pta'sxsatx thegçxa' na'jīk:

—Adx mama adx nyakhwe'sxa' naata'. <sup>35</sup> Dxus jxkaahni's nwēese'jna kxtey yuusáa yuuçxáa, adx nyakh, adx npe'sx, adx mama na'wēsata' jĭk.

## 4

### *Skuutxh uuhsa's kaaja'da'jni*

*(Mt 13.1-9; Lk 8.4-8)*

<sup>1</sup> Jesusa' ki'kin ĭkh wala pukate kaapiya'jya' kasehte', nasa iiméh wala kuh pkhaakheçxa utaaçte', Jesusa' barkote khēeçxak pta'sx. Aça' nasa yu' ĭkh wala pukate neeyūtx wēsē'jna. <sup>2</sup> Txajū' kĭjkĭhwa pta'sxku ejemplo yakh kaaja'da'jna. Sa' na'wēk kaapiya'j:

<sup>3</sup> —Mwēsē'jwe: Skuutxh uuhsa' ujxa' kasejk.

<sup>4</sup> Aça' mteei yu' dxi'jsu āasu neeyūte', vxiçxakwe ũ'tx. <sup>5</sup> Vxite ahsu' kwet kajkwesutx neeyū kiwe peççxáa ji'phsu. Sa' kiwe jwetmée ya'fxihbçxa' dudtxi buçxa. <sup>6</sup> Nawa sek açxaate' jxuka uhdxku, weçe dxiimeene' ji'phu' naa pa'ga. <sup>7</sup> Vxite ahsu' çhūçh ksxavxysutx ũsxi, aç'a' çhūçh walaaçxa jxuka aphte', çutmeeta'. <sup>8</sup> Vxite ahsu' kiwe ewsatek ũsxi, sa' buçxaçxa wala ew çuttxi. Maa tasxii yu' treinta, vxite' sesenta, vxite' cien nxinxtxi çut.

<sup>9</sup> Na'wē pta'sxthu txā'sa' jiyuwa'jsa ũsçxa', jiyune'kwe jĭk.

<sup>10</sup> Txajū' nasa kuhsa yu' u'the, Jesusçxáak neeyū, doce txhitxhnisawe'sx vxite nasa yakh. Aça' txāawe'sxa' paapējxtxi txāa ejemplo's ma'jĭnitewa jiyuya'. <sup>11</sup> Aça' Jesusa' pta'sxku:

—Dxus jxkaahni ensu ma'wē yūuwa'ja'swa kim yuhwa jiyunimeesa's i'kwe'sx yuutxi's

kaajiyu'jwa'ja'. Nawa jiyuwa'jmeesatxi's ejemplo yakhçxáa pta'sxwa'ja', <sup>12</sup> kxah uyçxawa, uysamée na'wêçxáa neeyũutxna, sa' wêsê'jçxawa, wêsê'jsamée na'wêçxáa neeyũuçxa Dxus tasxte sxawedmeetxna, açá' txãawe'sxtxi' Dxusa' peltunaĩmeena.

<sup>13</sup> Txajũ' na'wêk ãate kaajiyu':

—I'kwe'sxa' naa ejemplo's jiyu'çmeewá'kwe. Txã'wêçxa' ¿ma'wê vxite ejemplotxwa jiyuki'kwe? <sup>14</sup> Skuutxh uuhsa' Dxus yuwe's pta'sxsa na'wêsa'. <sup>15</sup> Maa nasaíi yu' skuutxh fxiw dxi'jsu ũsxisáa na'wêsata': Dxus yuwe's wêsê'jçxa ũuste jxpa'gatewa, eçxthê'j pa'jçxa txãa yuwe's ũusu kutxi'jina. <sup>16</sup> Vxite nasa' skuutxh fxiw kwet kajkwesu ũsxisáa na'wêsata': Dxus yuwe's açxhíi yu' weçxanatx jxpa'ga'. <sup>17</sup> Nawa ũusuh jxuka yajkççxa jxpa'gameeçxa', Dxus yuwe's ahçççxa pkxuüwa'j en pa'theçxáa txaçxmeyna wete'tx. <sup>18</sup> Açá' vxite nasa' skuutxh fxiw çhũçh ksxavxysu ũsxisáa na'wêsata': txãawe'sxa' Dxus yuwe's wêsê'thewa, <sup>19</sup> naa kiwete kǐjkǐhwa ji'phu wēenisaçxáa ũuste jxuka khēeçxa Dxus yuwe yu'sa' kaapeçxkana'juna. <sup>20</sup> Nawa maa nasaíi yu' skuutxh fxiw kiwe ewsate ũsxiçxa ma'wêta maaíi yu' treinta, vxite' sesenta vxite' cien nxinx pehna, txã'wê Dxus yuwe ũuste penawa'jsa'.

*Ãate jiyuwa'j yu' neeyũuwa'jsamée  
(Lk 8.16-18)*

<sup>21</sup> Txajũ' vxite ejemplo na'wêk pta'sx:

—Lampara's pki'taçxa ¿kaja dxiite meeçxa' atũu dxiite sũthnisatxná'? Txã'wê yũumée,

lampara's āatek ya'txaja', eena' kweethkahn.  
<sup>22</sup> Makwe sūttewa, uynimée yu' kīh yuhwa neeyūumeena. Sa' txā'wēy makwe ūusteçxáa yaakxnisa'swa jiyunimée yu' neeyūumeena.  
<sup>23</sup> Jiyuwa'jsa ūsçxa', jxpa'yakx mwēesē'jwe jīçxa', <sup>24</sup> na'wēk pta'sx:

—Adx kaapiya'jni's jxpa'yakx mwēesē'jwe. I'kwe'sx wa'lmée wēsē'the', Dxusa' jxthaakwe kaajiyu'juna. <sup>25</sup> Dxus yuwe's jiyuwa'jsa's kaajiyu'jni yuuna. Nawa Dxus yuwe's jiyuwa'jmeesa's kaajiyu'jnimée yuuna jīk.

*Dxus naa kiwete jxkaajxa' pa'jnisa*

<sup>26</sup> Jesusa' vxite ejemplo pta'sxku:

—Dxus naa kiwete jxkaajxa' pa'jnisa' na'wēsa': Teeçx piçthē'j mjīisa' fxiwa's kiwete uhçxaçxáa <sup>27</sup> u'jwe'k sa' txaçku thegya' pa'jaçmée. Aça' uuhnisa' buçxaçxa wala'k, nawa uuhsa yu' jiimeek yu' ma'wē buçxana walaaçtewa. <sup>28</sup> Fxiwa' kiwete ujaxā'the', peekxçxáa buçxa'k kīhwa yuumeetewa, nyafxte' tasx khuē'y wala'k, txā'wē yuuçxak spiiga kaseje', txāa e'su'k nxinx kaseje', <sup>29</sup> aça' thē'j ente', pkhakhya' kaseje'tx.

*Mostasa fxiwa's kaaja'da'jnisa*

*(Mt 13.31-32; Lk 13.18-19)*

<sup>30</sup> Vxite ejemplo pta'sx Jesusa':

—Dxus naa kiwete jxkaajxa' takhnisa's çkīh yakh kaaja'da'ja'kxtha'w aç jiyuki'kwe?  
<sup>31</sup> Mostasa fxiw na'wēsa' aça' txāa yakh kaaja'da'ja'nja'w.

Txāa fxiwa' maa maa fxiwtewa thaakwe musekuēta', <sup>32</sup> nawa kiwete ujaxā'the', maa ējxā tasxtewa jxthaakwek waláa, seena' wala çxhā'px

kasehna. Aça' vxiçxakwe yuhwa txãa êjxã ksxavxysu yaat-ya' âjã'tx. Naa kiwete Dxus jxkaajxa' takhnisa' txã'wēysa'.

*Ejemplo yakh kaapiya'jwa'ja's pta'sxni*  
(Mt 13.34-35)

<sup>33</sup> Jesusa' Dxus yuwe's txã'wēk pta'sxi' wala kuh ejemplo kutxi'jna, jiyuwa'jsa' jiyuya' âjākahn. <sup>34</sup> Ejemplo ji'phmēe yu' kaapiya'ja'çme'. Nawa txãa yakh u'jusawe'sx yuutxi's kīh ejemplo'swa jxuka khiyu'jçxak nvxiitu'.

*Marte wejxa wala's Jesus kxuujj'ni*  
(Mt 8.23-27; Lk 8.22-25)

<sup>35</sup> Txãa entey çxhi'dxna kījaçte', Jesusa' na'jīk txãa yakh u'jusawe'sxtxi':

—U'jwega ĩkh wala kuten jīte', <sup>36</sup> nasatx nvx- ihtna' Jesusa's pe'jna u'jtx txãawe'sx khēeçxa u'pni barkote. Aça' vxite barkowa ihtey u'jtx.

<sup>37</sup> ĩkh wala pxājūy u'jweçpkaçxha', wejxaa wala kiiteçxa barko's ĩkh dxiikhē akhya'wak yu', yu'a's barkote yuutaçxa. <sup>38</sup> Naapkaçxha' Jesusa' deenik yu', barko e'ste kaçxçxa dxik- the's peedxikiga khikhçxa. Aça' txãa yakh u'jusawe'sxa' Jesusa's fxīttxxi na'jīna:

—Īkh dxiikhē khējeçtha'w aça' ¿kwe'sxtxi' peeygāja'çmeega'? jīte', <sup>39</sup> Jesusa' kiiteçxa, we- jxa's we'wek yujukahn petx ĩkh yã'jçxa. Naap- kaçxha' wejxa yujute', ĩkhwa yujuk.

<sup>40</sup> Txajū' Jesusa' txãa yakh u'jusawe'sxtxi' na'jīk: ¿Kīh yuuçxakwe Dxus yu's yajkxmēe txakwe wala ũukhú'? jīk.



41 Txã'wě wejxa yuhwa nwēese'the', txãawe'sxa' wala kuh yajkxna neeyũutx na'jina:  
 —Naa piçthē'ja' ¿kim yujkx, açi'tx wejxa ìkh txã'wēsa yuhwa nwēesē'jé'? jĩ'tx.

## 5

### *Gadara kiwetewe'sx eçx iyamunisa* *(Mt 8.28-34; Lk 8.26-39)*

<sup>1</sup> Txajũ' ìkh wala kute Gadara kiwete pa'jtx.  
<sup>2</sup> Aça' Jesus barkoju kasejeçpkaçxha', teeçx piçthē'j eçx iyamunisa uusáa pedani kafxu kasehçxa Jesus tasxte utxaak. <sup>3</sup> Txãa piçthē'ja' uusáa pedani kafxsuk u'psa yu', aça' txã'sa' kim yuhwa çam kadenaju tudçxa jxpe'jya' ajã'çmeeta'. <sup>4</sup> Çxida petx kuse yã'jçxa maazkuēe uswa tudtewa, nuywejiméek çxuktedeçxa pūsxi'. Aça' kim yuhwa ajã'çmeeta' tudçxa jxpe'jya' yu'. <sup>5</sup> En ma'k yuu kus ma'k yuu nawa vxıçsu vxite' uusáa pedani kafxsu weynak pekũjũ' kwet-su kpã'yuuna. <sup>6</sup> Nawa Jesusa's jxu'the uyçxa', wuwuuna u'jçxa txajx tasxte peejxũkwek <sup>7</sup> sus we'wena:

—¿Adxa's kīh yũuya'waga? Jesus, Dxus ìtxĩsa Nçxi'k. Dxus pa'ga adxa's peeygãhçxa txakwe seena' wala nxuste yu' kaahnu jĩk. <sup>8</sup> Jesusa' eçx luuku vxit-sa's we'weçxa': Naa piçthē'j ũusu mkaaseh jĩpa'gak txã'jĩ'.

<sup>9</sup> Txajũ' Jesusa' pějxku:

—¿Kīh yaasega? jĩte', pta'sxku:

—Legion yaaseth, wala kuhtha'w naa pa'ga jĩk.

<sup>10</sup> Sa' txãa eçx luuku vxit-sa' wala pxthaa we'wek txãa kiwejũ kutxi'khamen.

11 Txajũ' kxsũ vxiç ja'dasũ wala kuçxi ũsu'tx aphna. 12 Aça' eçx luuku vxit-sa' na'jĩnatx pxthaa we'we:

—Kuçxi ũuste khēeya' u'khan kwe'sxtxi mkaah jĩte', 13 Jesusa' txãa eçx luuku vxit-satx kuçxi ũuste u'kaya' kaakh.

Txajũ' txãa eçx luuku vxit-sa kuçxi ũuste khēete', kuçxi' luuku yuuçxa penxakhē peluçxa yu'teçxaçxáa khēeçxa jxuka uutx. Txãa kuçxi' dos mil āhtx yu';

14 Txã'wē yũute', kuçxi thegsa ũukhçxa wala dud pta'sxya' u'jtx çxhabsu vxite' çxhab ekaju jxuka. Aça' nasa' wala pa'jtx thegya', kĩh yũutewa uyya'. 15 Sa' Jesus ũsnite pa'jçxa uytxi txãa piçthē'j eçx luuku vxitnisa' wēt yā'j ropa ji'ph u'pte. Txã'wē uyçxa wala ũukhtxi.

16 Txajũ' ma'wē yũuçxa eçx luuku vxitnisa katxhini vxite' kĩh yũuçxa kuçxi uuni'swa uysaawe'sxa' jxuka pta'sxtxi nasa thegya' pa'jsatxi's. 17 Txajũ' nasa' Jesusa's ũusçxa we'wetx txãawe'sx kiwejũ u'khan.

18 Aça' Jesusa' ki' sxawedxa' barkote khējeçpkaçha', eçx luuku vxitnijũ katxhisa' wala pxthaa we'wek pe'jçxa u'khan. 19 Nawa Jesusa' pe'jna u'jmée na'wēk jxkaah:

—Iidx yatna me'j, sa' iidx nwe'sxtxi pta'sxine'ga idxa's Dxus peeygãhçxa ma'wē ew yũuni'swa.

20 Txajũ' txãa piçthē'ja' u'jçxa, Dekapolis çxhabsu jxuka pta'sxku Jesus ma'wē yũuçxa nuykatxhini'swa. Aça' nasa' wala kuh yaaki'tx jxukaysa.

*Jairo niisa vxite' Jesus atxhte jxa'dxxa*  
(Mt 9.18-26; Lk 8.40-56)

<sup>21</sup> Txajũ' Jesusa' ìkh wala kutejũ barkote khêeçxa pesahçxa kxtee ũste', nasa wala pa'jtx txajx ũsnite. <sup>22</sup> Aça' judiuwe'sx pkhaakhenite npiiçthê'jsa Jairo yaasesa' Jesus tasxte pee-jxũkweçxa <sup>23</sup> na'wêk pxthaa we'we:

—Adx niisakuẽ' uuçyã'ja', aça' uukahmén myuh jxa'dxya' iidx kuseju jïte', <sup>24</sup> txãa yakh u'kh Jesusa'. Aça' nasa iiméh wala pehnaçxa, dxi'the zuuna'çxáatx u'jweç yu'. <sup>25</sup> Aça' txãa nasa ksxavxyte teeçx u'y kakwe yu' vxyaate doce anxuyã'j açã'na u'jusak kaseh. <sup>26</sup> Sa' txãa açã'sa' wala pxthaa yuusa yu'k yu'çe'jsatx paapêjxna. Sa' makwe yu'çe weyna txajx ji'phuni jxuka pçuutewa, kîh yuhwa yu'çe yuumée jweeíçxáak jxthaakwena u'jweç yu'.

<sup>27</sup> Txajũ' txãa u'ya' Jesus kîh yũusaatewa jiyuçxa' paaçte e'su kũhçxa, kpaajxa'dxku txajx atxhkhẽ. <sup>28</sup> Txã'wẽ Jesus atxhkhẽ kpaajxa'dxçxaçxáa katxhi'nja sũhçxak txã'wẽ yũu. <sup>29</sup> Sa' txã'wẽ jxa'dxiçpkaçxha', kakwe yu' vxyaame', aça' txãa dudtey txajx kakwete wêt yã'kh yajkx.

<sup>30</sup> Txajũ' Jesusa' teeçx açã'sa txajx atxhkhẽ jxa'dxçxa katxhini's jiyuk, sa' nasaa ksxavxyte u'jweçíi yu'thegçxa', na'jîk:

—¿Kimga adx atxhkhẽ jxa'dx? jïte',  
<sup>31</sup> Pedrowe'sxa' na'wêtx pas:

—Nasaa ksxavxyte zuuna'çxáa u'jweçgu sa' ¿ma'wêga kimga jxa'dx jîna we'wé'? jïtewa,

<sup>32</sup> Jesusa' nasaa ksxavxysu thegu'gku kim jxa'dxtewa uyya'.

<sup>33</sup> Txajũ' txãa u'ya' txã'wẽ naa dudte ew katxhini's ãsxiimée pta'sxna ũukhna Jesus tasxte yayan kũhçxa peejxũkwek. <sup>34</sup> Aça' Jesusa' na'wẽk we'we:

—I'kwe' ũusuh jxuka yajkxçxane'kwe katxhiya' sũhçxa adx tasxte utxãa, txãa pa'ga katxhini i'kwe neeyũu. ãçxha' ãçã'mée wêt me'jwe weçxana jík.

<sup>35</sup> Jesusa' txã'wẽ we'wena nee ũsiyna, Jairo yatu yuusa kũhçxa' Jairo's pta'sxtxi:

—Iidx niisakuẽ' uuyã'kh, aça' kuçx pa'pçxunu kaapiya'jsa's pe'jna u'jya' jĩte', <sup>36</sup> Jesusa' wẽsẽ'jçxa, Jairo's kvxiisxa'kh na'jĩna:

—Nxusnu. Adx ewuwa'ja'sçxãa myajkx jĩçxa', <sup>37</sup> Jesusa' vxite yuutxi's pe'jmée, pxakhsa Jakobo Juan vxite' Pedro txãawe'sxçxáatxku pe'jçxa u'j. <sup>38</sup> Sa' Jairo yatte pa'jçxa', uyku nasa wala ũ'nena ũste. <sup>39</sup> Sa' dxiite u'kaçxa we'wek:

—¿Kĩjxa'kwe txakwe wala ũ'né'? Luuçxa' uunime', Ĩ'neeçxãa deeni' jĩte', <sup>40</sup> nasa' Jesusa's npeevxysxijkatx. Aça' Jesusa' nasatx jxuka eka kutxi'jçxa, txãa luuçx neywe'sx vxite' txãa yakh yuusa tekhsa txãawe'sx yakh uusãa ũsnite utx-aaçxa, <sup>41</sup> kuseju pu'kisçxa na'wẽk we'we:

—Talita kumi—txã' na'jĩni': Ijçxa'sthi we'we' mkiiteçx jĩni'. <sup>42</sup> Txã'jĩçpkaçxha' txãa uusá' kiiteçxa u'juya' ãjãk. Aça' Jesus txã'wẽ uusá's ki' ĩtxĩ vxitte uyçxa', wala kuh yajkxtxi. <sup>43</sup> Txajũ' Jesusa' wala neewe'wek maa yuhtxwa

pta'sxkahnén, sa' txãa luuçxa's puuçkaakh.  
Txãa luuçxa' doce anxu ji'phsak yu'.

## 6

*Jesusa' Nasaretna u'jni*

*(Mt 13.53-58; Lk 4.16-30)*

<sup>1</sup> Jesusa' txãa çxhabu kasehçxa', txajx u'pni çxhab Nasaretnak sxawedna u'j txãa yakh u'jusawe'sx yakh. <sup>2</sup> Sa' sapatu jxkaase ente' judiuwe'sx pkhaakhenitek kaapiya'jna ũsu', açã' nasa jxukaysa wēsē'jçxa', kuh yajkxna na'jĩtx:

—Naa piçthē'ja' ¿mteega txakwe wala kĩjxa'wa piya? ¿Kim kaapiya'theki'k txakwe wala kĩjkĩh yũuya'wa ãjã'? <sup>3</sup> Naaíi kwe'sx jiyunisa karpintero' Maria nçxi'k. Sa' txajx nyakhtxiwa jiitha'w, Jakobo, Jose, Judas, Simon txãawe'sxta'. Açã' txajx npe'sxwe'sxwa naa çxhabtey u'pta'. Txã'wē kwe'sx jiyunisa' jĩçxatx Jesus kaapiya'jni's nwēesē'jya' wa'l.

<sup>4</sup> Txajũ' Jesusa' na'wēk we'we txãa nasatx:

—Mteewe'sxwa Dxus yuwe pta'sxsa yu'sa' wa'lmeetx jxpaga'. Nawa peekx kiwetewe'sx yu' jxpaga'çmeeta' vxite' peekx nwe'sx, peekx yattewe'sx.

<sup>5</sup> Txã'jĩçxa' kxteea' mazkuēçxáa nuykatx-hiçxaçxáa jwee yu' kĩhwa yũume'. <sup>6</sup> Sa' Jesusa' nxusnak neeyũu, txã'wē txajx kiwetewe'sx nwēesē'jmeete.

Txajũ' Jesusa' vxite çxhabsuk pta'sxya' kaseh.

*Docesatx Dxus yuwe's pta'sxya' kaahni*

*(Mt 10.5-15; Lk 9.1-6)*

<sup>7</sup> Sa' txãa yakh u'jusa docesatx pa'yaçxa', eçx luuku vxit-satx nasa ũusu kutxi'jya' ãjãwa'ja's ũsçxa', e'z e'zku kaah. <sup>8</sup> Nawa khãabuçxá's atçxa kīh yuhwa tu'sméek u'khaah, ya'ja, vxyu, kaame txã'wēsax. <sup>9</sup> Sa' pelgatxiçxáa paatçxa teeçx kmiisa yakhçxáak u'khaah. <sup>10</sup> Sa' na'wē yūuwa'ja'sku pta'sx: Maa yatte paadejxa' pa'jyã'jçxa', kxteeçxáa paadehna ũsune'kwe txajū ki' kasehna u'phkaçx. <sup>11</sup> Sa' mteefi yu' i'kwe'sx pta'sxni's wēsē'j wēemeeçxa yat pki'jmeete', txãajū kasejene'kwe i'kwe'sx çxidate kiwe tuhda's sakweekweçxa, kxah yuuwesa yuutxna. Isath we'we': Dxus kastigãywa'j en ãhte', txãawe'sxa' Sodoma Gomoçxa çxhabetewe'sxte jxthaakwe kastigo's knayuutxna txã'wē i'kwe'sxtxi jxpa'gaya' wa'lpa'ga.

<sup>12</sup> Txã'wē Jesus jxkaahte', txãawe'sxa' kasehtx Dxus yuwe's pta'sxna, pkaltxi nvxihtçxa Dxus tasxte misxawedwe jīna. <sup>13</sup> Sa' eçx luuku vxit-satxwa nasa ũusu kutxi'jna maazkuēē ãçã'satxwa aceite dxikthekhē awna nuykatxhitx.

### *Juan Bautista uuní*

*(Mt 14.1-12; Lk 9.7-9)*

<sup>14</sup> Txã'wē Jesus kījkīhwa ew yūuni's ne'jwe'sx Herodes jiyuçxa':

—Juan Bautistane' uuçxawa ki' itxī yuu, txãasane' kījkīh yūuya'wa ãjã' jīte', <sup>15</sup> vxite nasa we'weçxa':

—Naa piçthē'ja' Dxus yuwe pta'sxsa Eliasna jī'tx. Naapkaçxha' vxite we'weçxa':

—Txãniiteywa ma'wēta Dxus yuwe pta'sxsa kaseje', txã'wēysana jīnatx ũsu'.

16 Nasa txã'wẽ we'wete', Herodeswa we'weçxa':

—Juan Bautista txhikha's na'wẽ kaaspẽ'the'th txãane' ki' itxĩ yuuçxa kiite jik.

17 Herodesa' Juana's na'wẽ yuuçxaga kiikhe'j: Herodesa' Juana's kadenaju tudçxa karcelte ktxaaja'khu'ga, Herodias ahçeçxa ewmée yuwe ũspa'ga. Txãa Herodiasa' Fxelipe nyuuk yu', aça' Fxelipe yu' Herodes nyakhíçxáak yu'. Nawa Herodesa' Fxelipe nyu Herodiasa's kusa'jçxa txajx nyu na'wẽk jxpe'j. 18 Txãa pa'ga ku'ga Juana' Herodesa's na'jina yu'kxpeh: lidx yakhthẽ'j nyu's kusa'jçxa' iidx nyu na'wẽ jxpe'jni' ewme' jini's 19 Herodias jiyuçxa', Juana's ahçeçxa ikh wẽeçxawa ãjã'çmeeku'ga. 20 Juana's Herodias ikhya' ãjãkahmén, Herodesa' karcelteku'ga ktxaaja'j nwe'wena. Juana' Dxus dxi'pte kĩhte yuhwa jxpubamée wala ew fxi'zesatewa Herodesa' jüine' yu', txãasane' ũukhçxa nwe'we, sa' Juan pta'sxni's Herodesa' kxtey yuuçmeeçxawa wa'lmeeku'ga weçxana wẽsẽ'je'.

21 Herodesa' txajx upxni en anxu ãa iisak fxi-esta vxitu'. Txãasak teeçx ente' fxiesta ki'p txajx jxkaahni npiičthẽ'jsa vxite' Galileate jxtuhthesatx pi'kxçxa. Txãa fxiestatene' Herodiasa' Juana's ewmée yūuwa'ja's uy. 22 Txajũ' Herodias niisa' txãa fxiestate pa'jçxa' wala zhiçxkwe ku'jne' pi'kxnasa dxi'pte. Aça' ne'jwe'sx Herodes uyçxa' na'jiku'ga txãa kna'sa's:

—Ijçxa kĩh pějxtewa, adxa' ũsu'nja. 23 Dxus uyte, içxa pěyni's kĩhnawa ũsuçxá'nja, meeçxa' adx jxkaahna ũsni kiwe's pějxyuhtewa pxãhn

txuhdeçxa ũsu'nja jĭte', <sup>24</sup> txāa kna'sa' kasehna u'jçxa, txajx nĭ'ja'sku'ga paapĕjx:

—¿Kĭh pĕyi'ki'th? jĭna. Aça' nĭ'j pasçxa':

—Juan Bautista dxikthea's mpĕyçxi jĭnaku'ga jxkaah. <sup>25</sup> Txajŭ' txāa kna'sa' Herodes tasxte ki' kŭhçxa':

—Açxhĭi Juan Bautista dxikthea's plaatute akhçxa mah jĭte', <sup>26</sup> ne'jwe'sx Herodesa': Kĭh pĕjxtewa ũsu'nja jĭna nasaa dxi'pte jurāyyā'jçxa', ĭsxiiya' ājāmeeku'ga. <sup>27</sup> Txajŭ' Herodesa' dudtey teeçx soldau's kaakhu'ga Juan dxikthea's nikxya'. <sup>28</sup> Aça' txāa soldau' karcelna u'jçxa', Juan txhikha's spĕ'thçxa, plaatute akhçxa jxŭna kŭjku'ga txāa kna'sa's ũsya'. Aça' txāa yu' jxpa'gaçxa', txajx nĭ'ja'sku'ga dukh. <sup>29</sup> Txā'wĕ yŭute', Juan yakh u'jusawe'sx jiyuçxa', txāa uuni kakwe's kiisçxa pedaaku'ta. Txā'wĕ yŭuni'sne' Herodesa' yajkx.

*Cinko mil nasatx Jesus sã'jĭni*

*(Mt 14.13-21; Lk 9.10-17; Jn 6.1-14)*

<sup>30</sup> Txā'wĕ e'z e'z jxkaahnisawe'sxa' Jesus tasxte ki' sxawedna pa'jçxa', txāawe'sx ma'wĕ kaapiya'jna kĭhçxa yŭuçxawa Jesusa's jxuka pta'sxtxi. <sup>31</sup> Txā'wĕ nasa txakwe wala pa'jna ũste', txāawe'sxa' ũ'wa'j en yuhwa uymĕetx fxi'zena ũsu'. Txāa pa'gak Jesus we'weçxa':

—Mejkawe, dudte jxkaaseya' nasaa yatmeesu jĭ'.

<sup>32</sup> Txajŭ' Jesusa' txāa yakh u'jusawe'sxçxáatx pe'jçxa, barkote khĕeçxa u'kh, nasaa yatmeesu pa'jçxa jxkaaseya'. <sup>33</sup> Txā'wĕ Jesus u'jweçte nasa wala uyçxa', mtee pa'jya' u'jweçtewa



jiiyutx. Txãasatx txãawe'sx khuẽ'y yaçte pa'j Jesus pa'jwa'the maa çxhabuwe'sxwa wuwuuçxáa u'jçxa. <sup>34</sup> Aça' Jesus barkoju kasejeççxa', uyku nasa wala kuh pkhaakhena ũste. Sa' txãawe'sxtxi's peeygãjk txã'wẽ piisxáa namu ji'phmeesa na'wẽ txãawe'sxçxáa ũste. Txajũ' Dxus yuwe's wala kaapiya'kh.

<sup>35</sup> Kxtee kaapiya'jna ũsiyna kusuçte', txãa yakh u'jusawe'sxa' txajx tasxte utxaaçxa na'wẽtx we'we:

—Aysu nasaa yatmeete ũsiyna, kusuçá'.

<sup>36</sup> Aça' nasatxi' mkaah, kxah yat-su meeçxawa çxhabkuẽ utxasu ũsta' kxsũ pa'jçxa ũ'wa'j weyu-utxna. Txã'wẽme' ayte' kîhwa ji'phmeeta' jîte',

<sup>37</sup> Jesus paççxa':

—I'kwe'sx mpuuçwe jînak jxkaah.

Aça' txãawe'sxa' na'wẽtx pas:

—Kwe'sxa' doscientos peso pan weyya' u'jçxa puuçuwá'nja'w jîte', <sup>38</sup> Jesusa' pějxku:

—¿Maz pan ji'phkwe? Me'jwe thegya' jîna.

Aça' pan uyçxa', pta'sxtxi:

—Tahç pan, e'z wedxçxáatha'w uy jîna.

<sup>39</sup> Txajũ' Jesusa' nasatxi' txaksũ kaççkaakh fxi-ixii txuteeçxa. <sup>40</sup> Aça' cien ãh vxite' cinkwenta kxaztxi fxiiifxii txuteeçxa kaçç. <sup>41</sup> Naapkaççha' Jesusa' tahç pan e'z wedxtxi uweçxa, cielute pagayçxa Dxusa's weçxana'wa pantxi pe'ltedeçxa txãa yakh u'jusawe'sxtxi' ũsku, nasatx jxuka ũsu'skahn. Sa' wedxtxiwa txã'wẽyku ũsu's jxukaysatx. <sup>42</sup> Txã'wẽ yũute', jxukaysa ũ'çxa txixtxi neeyũ. <sup>43</sup> Txajũ' txãa pan vxite' wedx

pe'ltedenisa neeyũute' pkhakhçxa', doce kanas-tate utatx pkhakh. <sup>44</sup> Aça' nasa yu' piçthẽ'jçxáatx isani cinko mil ähtx yu'.

*Ïkh kajkwega Jesus u'juni*  
(Mt 14.22-27; Jn 6.16-21)

<sup>45</sup> Txajũ' Jesusa' txãa yakh u'jusawe'sxtxi barkote kaateka'jçxa yaçte kaakh Beçaidan. Txã'wẽ yũuçxa' txãa yu' kxtee neeyũuk nasa txu-teena u'jsatx weçxana. <sup>46</sup> Sa' nasa jxuka txuteena u'jweçpkaçxha', Dxus yakh puutx we'weya' u'kh thã'the.

<sup>47</sup> Jxuka çxhi'dxna jxã'jaçte', barko' ïkh pxãjũy u'jweçku yu', Nawa Jesus yu', ïkh kutetee ũsíçxáak yu'. <sup>48</sup> Sa' khikhyna sẽjeçte', Jesusa' uyku Beçaidan u'jsawe'sxtxi's wejxa yupte, barko's kaajxa' çxhãçxhamée ïkhsu u'jute.

Txajũ', Jesusa' txãawe'sxtxi kpajkxya' ïkhsu u'jçxa, txãawe'sx pukasu utxa sẽhçxa, barko's phyahçna skhẽuuçku yu'. <sup>49</sup> Aça' barkote u'jsawe'sxa' txã'wẽ ïkhsu u'jweçte uyçxa', eçxa'stha'w uy sũhçxa sustxi pebé. <sup>50</sup> Txã'sa' jxukaysatx uyçxa ũukh. Naapkaçxha' Jesusa' we'wek:

—Ûukhnuwe. Adxthu jĩna.

<sup>51</sup> Txajũ' Jesusa' barkote khẽjeçpkaçxha', wejxa' yujuk. Aça' txãawe'sxa' iiméh wala ũukh yajkxna kuh we'wenatx neeyũ. <sup>52</sup> Txã'wẽ Dxus Nçxi'kçxa kĩjxa'wa äjãwa'jsaçxak kuhmée pan yakh nasa txaazkuéesatx sã'jĩ' sũhwa'j yu'sa' ji'phmeene'ta yu', txãasatx txakwe wala kuh yajkxna neeyũ.

*Genesarettewe'sxtxi Jesus nuykatxhini*  
*(Mt 14.34-36)*

<sup>53</sup> Txajũ' Genesaret kiwete pesahçxa', barko's ìkh pukatetx tudçxa txah. <sup>54</sup> Aça' barkoju sa'jaçpkaçxha', txãa kiwesuwe'sx nasa' jiyutx Jesus pa'jni's. <sup>55</sup> Sa' txãa kiwesu açã'satx jxuka pkhakhçxa yakhna pa'jtx Jesus mtee ũstewa. <sup>56</sup> Txajũ' Jesusa' çxhabna ma'k u'j, meeçxa' yat-su ma'k pa'jya' u'j, meeçxa' dxi'the ma'k u'jweç yuu nawa txajx skhẽwwa'jsutx açã'satx khikhe'. Txã'wẽ yũuçxatx skhẽuuçte' wala pxthaa we'we', txajx atxh vxiçteçxáawa açã'satx khya'dxi'khan. Aça' maawa txajx atxh vxiçteçxáawa jxa'dxsa', jxuka katxhiçxatx neeyũ'.

## 7

*Nasa's ewmée vxit-sa*  
*(Mt 15.1-20)*

<sup>1</sup> Txajũ' fxariseowe'sx vxite' Dxus leya's kaapiya'jsawe'sxwa Jerusalenu pa'jçxa Jesus tasxte utxaatx thegya'. <sup>2</sup> Aça' Jesus yakh u'jusawe'sxa' kusekhẽ' yu' kaahmée ũ'weçte uyçxa', açewe'wetx fxariseowe'sxa'.

<sup>3</sup> (Yaçgawe'sx ma'wẽ jxkaathe' Judiuwe'sxa' jxukaysa na'wẽ kuh jwed yũuwa'ja'stxi nwẽesẽ'jẽ' ewmeesa pẽethekahmén jičxa: <sup>4</sup> Merkaujũ pa'jçxa', kusekhẽ yu' kaahwa'ja' jĩ'tx. Sa' waso, mitxh, kĩhwa iixũni çam yuutxi' jxuka kajkwekhẽ yu' kaahçxa iixũwa'ja' jĩnatx kaapiya'ja'.)

<sup>5</sup> Txãasatx fxariseowe'sx vxite' Dxus leya's kaapiya'jsawe'sxa' na'jĩna Jesusa's pẽjx:

—Idx yakh u'jusawe'sxa' ħkīh yūuḥxata yaḡgawe'sx kaapiya'jnitxi' kxtey yu'ḥmēe, kusekhē yu' kaahmēe ū'wé'? jīte', <sup>6</sup> Jesusa' na'wēk pas:

—I'kwe'sxa' yuwejuḥxáa ew we'weḥxa', ūuste yu' ewmēeḥxáa yaakxsai'kwe aḥa' Isaiasa' isa yuh Dxus we'weni's na'jīna fxi'jne':

Naa nasa' yuweju yu' adxa's yaaki'tha'w jīḥxawa, Ūusuh yu' adxa's yaaki'ḥmeeta'.

<sup>7</sup> Naa kiwete nasaa kaapiya'jniḥxá's kxtey yuuna ūsḥxa,

Txā'wē Dxus jxkaahni'stha'w kxtey yu' jīte', kxul yuhna jīna Dxus we'weni'sku fxi'j Isaiasa'.

<sup>8</sup> I'kwe'sxa' Dxus jxkaahni yu'sa' nvxihtḥxa, naa kiwega nasaa kaapiya'jniḥxá's i'kwe nwēesē'jna wala ew ki'su' na'wē yūuna: waso, mitxh, kījkīhtxwa txā'wē i'kwe ki'su' yu' kaahna.

<sup>9</sup> Na'jī'th na': i'kwe'sxa' naa kiwega nasaa kaapiya'jniḥxá's nwēesē'jna ki'sḥxa', Dxus jxkaahni yu'sa' nvxihti'kwe. <sup>10</sup> I'kwe'sx na'wē yūuni's myajkxwe wakx: Moisesa' na'jīnak fxi'j: Iidx tata iidx mama txāawe'sxtxi' peeygāhna pu'ḥxwa'ja' jī'k. Aḥa' txā'wē yūumēe, neywe'sxtxi aḥewe'wesa' uu ena's jī'phuna jī'k. <sup>11-13</sup> I'kwe'sx yaḡgawe'sxa' na'wētx kaapiya'ja': Maa nasawa neywe'sxtxi peeygāhna pu'ḥxmēe, adx jī'phuni i'kwe'sxtxi pu'ḥxwa'ja's Dxusna dukhe'nja jīna we'weḥxaḥxáa, neywe'sxtxi' pu'ḥxmeetewa ewa' jī'tx. Nawa i'kwe'sxa' txā'wē yaḡgawe'sx kaapiya'jniḥxá's kxtey nwēese'jḥxa', Dxus jxkaahni yu'sa' kxtey

yu'çmeei'kwe, naasáa Dxus jxkaahnimeeçxáatx i'kwe kījīhnawa jxuka kxtey yu'.

<sup>14</sup> Jesusa' ki'kin nasatx we'weçxa' na'jīk:

—Mwēesē'jwe jxukaysa, ew jiyuya': <sup>15</sup> Kīh ũ'wa tutxhteçxáa khēesa yu', nasatx ewmeesa vxitu'çme'. Naasáa ũusuh ewmée yaakxnisa yuuçxáak nasatx ewmeesa vxitu'. <sup>16</sup> Aça' maawa jiyuwa'jsa ũsçxa', jiyune'kwe jīçxak nvxiht.

<sup>17</sup> Txajū' Jesusa' nasatx txuteeçxa' yattek u'ka. Aça' txāa yakh u'jusawe'sxa' jiyumeeçxa' pējxtxi txā'wē pta'sxni's. <sup>18</sup> Aça' Jesusa' na'wēk we'wena pta'sx:

—¿I'kwe'sxwa jiyu'çmeewá'kwe? Kīh ũ'wa tutxhteçxáa khēeçxa', nasatx ewméesa yu' vx-itmeena sūju'çmeewá'kwe. <sup>19</sup> Txāa pa'gatey kīh ũ'wa ũuste yu' u'kamée tutxhteçxáa khēeçxa', txajū ki' kaseje'k jīk.

Jesusa' txā'wē we'weçxa': ũ'nisa yu' kīhwa jxuka ewsaçxaçxáata' jīçxak txā'jī'.

<sup>20</sup> Nawa ũusuh ewmée yaakxnisa yuuçxáak nasa's ewmeesa vxitu'. <sup>21</sup> Txāa pa'gatey, kazx yaakxni, ptamsaçxawa vxite yakh kazx yuuna fxi'zeni, kazx yuuni, nasa ikhni, <sup>22</sup> pesweeni, vx-ite jī's kusa'jçxa ji'phu wēeni, pthāaweni, īsxīini, vxitetx ahçena fxi'zeni, wēesxuni, kazx we'wena fxi'zeni, iiwejçx iiwejçx yajkxna fxi'zeni, kīhtewa ewmeeçxáa yūuna fxi'zeni <sup>23</sup> txā'wē ewmée yaakxnisa' ũustewe'sxta'. Txāasatx txā'wē kaaūusuthe'jçxa, nasa's ewmeesa vxitu'.

*Teeçx u'y judiu jī'jmeesa Jesusa's jxpa'gasa  
(Mt 15.21-28)*

<sup>24</sup> Jesusa' txãajũ kasehçxa', Tiro Sidon çxhab ja'dasuk pekũjxa' u'j. Sa' kxsũ pa'jçxa', teeçx yatte u'kaçxa, kim yuhwa jiyu jxthãasme'. Nawa kim yuhwa jiyunimeete u'juya' yu' ãjãme'.  
<sup>25-26</sup> Txajũ' teeçx u'y Sirofxenicia kiwetewe'sxa' Jesus pa'jni's jiyuçxa pa'kh. Sa' tasxte pee-jxũkweçxa pxthaa we'wek:

—Niisa ji'phthu txã'sa' eçx luuku vxit-sak iiyamu. Aça' txãa eçxa's nuukutxi'jine'ga ũusu jĩna pi'kxte', <sup>27</sup> Jesus pasçxa na'jĩk:

—Mũyhaswe, luuçx khuẽ'y ũ'kahn. Txã'wẽ luuçx ũ'wa'ja's kusa'jçxa alkutx ũswa'jme' jĩte',  
<sup>28</sup> txãa u'y pasçxa':

—Isa yuh we'we'g, txã'wẽ yuja'. Nawa alku' mesa dxiiisu ũsçxa', pejka ũ'wẽ'tx luuçx ũ' pe'yaçxáatxwa jĩte', <sup>29</sup> Jesus pasçxa':

—Isa, txã'wẽ yuja'. Aça' me'jwe, i'kwe jx-thãasni's uyuune'kwe, eçx luuku vxit-sa' i'kwe niisa ũusu kasejxã'kh jĩte', <sup>30</sup> txãa u'ya' yatna sxawedçxa uyku, eçxa' ũusu kasehte' wẽt yã'j kamaga ũste.

*Teeçx piçthẽ'j wẽse'jya' we'weya'wa  
 ãjasame's Jesus nuykatxhini*

<sup>31</sup> Jesusa' ki'kin Tiro kiwejũ kasehçxa, Sidon çxhabuy vxite' Dekapolis kiwey uykhẽwna u'jçxa, Galilea ìkh walatek pa'j.  
<sup>32</sup> Kxteea' teeçx piçthẽ'j wẽsẽ'jya' we'weya'wa ãjãsame'stxi Jesus tasxte nuypa'jçxa pxthaa we'we nuykatxhikahn. <sup>33</sup> Aça' Jesusa' txãa ãçã'sa's nasameete fxii pe'jna u'jçxa, thũ'wẽ kafxte pdxi'p jxa'dxna'wa, txajx fxne'sxa's kuse

vxiçte kuuçhe'jna', thunetewa jxa'dxku. <sup>34</sup> Sa' ũusdxi'na cielute pagayçxa:

—¡Efxata!—jĩk, tee phaate jĩçxak txã'jĩ'.

<sup>35</sup> Txã'jĩçpkaçxha', thũ'wẽ kafxa' phaateçx, aç'a' thunewa ewuute', ew we'weya' ãjãk.

<sup>36</sup> Txajũ' txãa nasatxi' Jesusa' wala neewe'wek, txã'wẽ yũuni's kim yuhtxwa pta'sxkahnén. Txã'wẽ ew neewe'wetewa, jweeĩçxáatx mtee mteewa pta'sxna jxã'j. <sup>37</sup> Txã'wẽ yũute', nasa jxukaysa wala kuh jwed yaaki'tx na'jĩna:

—Ãçã' ma'wẽsatxwa jxukak pu'çxhi'. Wẽsẽ'jya' ãjãsameetxwa kwẽesẽ'je'kh, sa' we'weya' ãjãsameetxwa kwe'we'je'kh jĩ'tx.

## 8

### *Kuatro mil nasatx Jesus sã'jĩni*

*(Mt 15:32-39)*

<sup>1</sup> Txãa entey nasa iiméh wala kuh pkhaakheçxa kĩh yuhwa ũ'wa'j ji'phmeete', Jesusa' txãa yakh u'jusawe'sxtxi pa'yaçxa na'jĩk:

<sup>2</sup> —Naa nasa' tekh en yã'j adx yakh ũsta', nawa kĩh yuhwa ũ'wa'j ji'phmeeta' aç'a' adxa' peeygãja'th. <sup>3</sup> Kĩh yuhwa puuçmée yatna kaathe', maaíi yu' jxu'juwe'sxta' na' wẽeçxa dxi'the çxhãçxhameetxna jĩte', <sup>4</sup> txãa yakh u'jusawe'sx pasçxa':

—¿Ma'wẽ puuçya' ya'ãjãkx, aysũ' nasaa yatçxáa yuhwa meeta' aç'a'? jĩte', <sup>5</sup> Jesus pẽjxçxa':

—I'kwe'sxa' ¿maz pan ji'phkwe? jĩte':

—Sieteçxáa ji'ptha'w jĩnatx pas.

<sup>6</sup> Txajü' Jesusa' nasatx kiwesu kaçxkaahçxa', siete pantxi jxpa'gaçxa Dxusna weçxana'wa, pe'ltedeçxa txãa yakh u'jusawe'sxtxi üsu'sku, nasa txazkuêesatx puuçkahn. Aça' txãawe'sxa' kxtex yuutx. <sup>7</sup> Sa' wedxwa ji'phu'tx kuhmeekwe, aça' Jesusa' Dxusna weçxana'wa, txãa wedxtxi txudeedekaakh. <sup>8</sup> Aça' jxukaysa txixtxi ü'. Txãa ü' kijxaate' siete kanastate utatx pkhakh. <sup>9</sup> Txãa ente txã'wē ü'sa' kuation mil ähtx yu'. Txajü' Jesusa' nasatx kaahna'wa, <sup>10</sup> txãa yu' barkote khêek txãa yakh u'jusawe'sx yakh Dalmanuta kiwen u'jya'.

*Fxariseowe'sx            cieluju            kîhçxáawa  
kaavxya'ja'khaahni*

*(Mt 16.1-4; Lk 12.54-56)*

<sup>11</sup> Kxtee pa'the', fxariseowe'sxwa pa'jçxa Jesus yakh puutx we'wetx. Sa' ma'wē yūutewa jiyuya' Jesusa's pējxtxi:

—Cieluju kîhçxáawa mkaavxya'ja'j jîna.

<sup>12</sup> Txã'jîte', Jesusa' wala nxus yajxna na'jîk:

—Naa nasa' çkîjxa'ki'tx txã'wē cieluju kaavxya'ja'j jxthāasu'? Isa yu' txãa nasatxi' kîhwa kaavxya'ja'jnimée wejx ewna jîk.

<sup>13</sup> Txã'jîçxa', nasatx nvxihtna' ki'kin barkote khêena'wa îkh kuten u'kh.

*Fxariseowe'sx kaapiya'jni's lewadura yakh  
kaaja'dajni*

*(Mt 16.5-12)*

<sup>14</sup> Sa' peçxkanaçxa ü'wa'j yu' ji'phmée barkote u'jweççxatx yajx. Naasáa teeçx pañçxáatx ji'ph yu'. <sup>15</sup> Txajü' Jesusa' na'wêk jxpa'yakx kaah:



—Mpa'yajkxwe, Herodes vxite' fjariseowe'sx lewadura ewmeesa's jīte', <sup>16</sup> Jesus yakh u'jusawe'sxa' txāawe'sx pwe'sx na'jīnatx puutx we'we:

—Pan ji'phmeetha'w, txāa pa'gane' txā'jī' jītx.  
<sup>17</sup> Aça' Jesus wēsē'jçxa na'jīk:

—¿Maa sūhçxakwe txā'wē pan ji'phmeetha'w jīna we'wé'? ¿Åçxpkaçx jiyu'çmeewá'kwe, pan ji'phmeetewa thēymée sã'jīni's yaaki'çmeewá'kwe? ¿I'kwe'sx ūuste khēje'çmeewá'? <sup>18</sup> I'kwe'sxa' yafxju yu' uyçxawa, jiyuya' yu' ājā'çmeewá'kwe, sa' adxa' kīhnawa thēymée ājāni's yaaki'çmeewá'kwe.  
<sup>19</sup> Miiyajkxwe wakx: Tahç pantxi txudeedeçxa cinko mil nasatx puuçte', ¿maz kanastakwe pkhakh kijxasaatxi'? jīte', txāawe'sx paşçxa':

—Doce kanastatha'w pkhakh jītx.

<sup>20</sup> —Aça' siete pantxi txudeedeçxa kuarto mil nasatx puuçte', ¿maz kanastakwe pkhakh kijxasaatxi'? jīte', txāawe'sx paşçxa':

—Siete kanastate utatha'w pkhakh jītx.

<sup>21</sup> Aça' Jesus we'weçxa':

—Txā'wē thēymée yūunisatxi' yaaki'çmeewá'kwe sane'kwe txā'wē ū'wa'j pan ji'phmeetha'w jīna we'we'.

### *Teeçx piçthē'j uyya' ājāsame's Jesus nuykatx-hini*

<sup>22</sup> Txajū' Jesusa' Beçaida çxhabte pa'the', kx-teea' teeçx piçthē'j uyya' ājāsame'stxi nuypa'j, nuykatxhikahn pxthaa we'wena. <sup>23</sup> Aça' Jesusa' txāa uyya' ājāsamée kusete pu'kisçxa, çxhab eka

pe'jna u'jçxa', yafxte fxne'sx sxûsxnaw'a yafxte jxa'dxku. Txã'wẽ yũuçxa pějxku:

—¿Ma'wẽçxá' uyu'gá'? jĩte', thegu'gçxa':

<sup>24</sup> —Nasa' fxtũu tasx na'wẽçxáatx vxya', nawa ěsẽ'se'tx jĩk.

<sup>25</sup> Txajũ' Jesusa' ki'kin txajx kuseju yafxte jxa'dxku, aça' yafxa' phaate'te' ew uyya' ajãk.

<sup>26</sup> Txajũ' Jesusa' neewe'wek:

—Çxhabsu u'kameene'ga, sa' maa yuhtxwa pta'sxmeene'ga iidx yafxtxi kim phaadetewa jĩnak yatna kaah.

*Pedro' jiyuk Jesusa' Dxus tasxu yuusatewa*

*(Mt 16.13-20; Lk 9.18-21)*

<sup>27</sup> Jesusa' txãajũ ki' u'kh txãa yakh u'jusawe'sx yakh kasehçxa. Sa' Fxilipo vxitni çxhab Cesarea ja'dasuk pekũjxa' u'jweç yu'. Txajũ' dxi'the u'jweçíi txãawe'sxtxi pějxku na'jĩna:

—Adxa's ¿kimna jĩ'ta nasa'? jĩte', <sup>28</sup> txãawe'sx pasçxa':

—Maái yu': Juan Bautistana jĩ'tx. Aça' vxite we'weçxa': Eliasna jĩ'tx. Aça' vxite we'wesa': Txãniiteywa ma'wẽta Dxus yuwe pta'sxsa kaseje' txã'wẽysana jĩ'tx jĩte', <sup>29</sup> Jesusa' na'jĩnak pějx:

—Aça' i'kwe'sxa' ¿kimna sũju'kwe'?

Txã'wẽ pějxte', Pedro pasçxa':

—Idxa' Kristo, Dxus tasxu yuusag jĩte',

<sup>30</sup> Jesusa' maa yuhtxwa pta'sxkaahme'.

*Jesusa' txajx uuwa'ja's pta'sxni*

*(Mt 16.21-28; Lk 9.22-27)*

<sup>31</sup> Txajũ' Jesusa' pta'sxku:

—Dxus Nçxi'k Nasa Yuusa' wala pkuuuni pa'ga yuuna, sa' judiu nthẽ'jsawe'sx vxite'

sacerdote npiiçthê'jwe'sx vxite' Dxus leya's kaapiya'jsawe'sx ahçeçxa kiikhe'jetxna. Aça' uuçxawa tekhte' ki' itxĩ yuuna jĩk.

<sup>32</sup> Jesusa' txã'wêk ew ãate pta'sx. Aça' Pedro' Jesusa's fxiite pe'jna u'jçxa, yu'kxpejk. <sup>33</sup> Txã'wê yu'kxpehte', Jesusa' vxitetx yu'thegçxa', Pedro's na'jĩnak pas:

—Eçxthê'j, adx tasxu mtxuté. Idxa' Dxus jxthãasni yu'sa' kxtey yuumée, naa kiwete nasaa yaakxnıçxá'sgu kxtey yuu wêjê' jıçxa', <sup>34</sup> Jesusa' txãa' yakh yuusawe'sxtxi pa'yaçxa na'jĩk:

—Maa nasawa adx yakh yuu wêeçxa', peekx kakwe jxthãasni's kĩhnawa jxuka nvxihtçxa yuuçxáa adx yakh yujxa' ajãne'kwe, makwe thêysa uuwa'j ma'k pa'j nawa txã'sa' yajkxmée. <sup>35</sup> Nawa naa kiwete itxĩ fxi'zewa'jçxá's ya'nwe'wesa', Dxus yakh fxi'zewa'j yu'sa' ivxiituna. Naapkaçxha' Dxus yuwe's nwêesê'jçxa adx yakh fxi'zepa'ga naa kiwete itxĩ fxi'zeni's yajkxmée ivxiitusa', Dxus yakh fxi'zewa'j yu'sa' ivxiitumeena. <sup>36</sup> Makwe naa kiwetewe'sx yu'sa' jxuka knayçxawa peekx ũus yu's ivxiitute', ¿kĩhteçxá' selpiima'k? <sup>37</sup> Peekx ũusa's ivxiituyã'the', ¿kimçxa' nwe'wema'k? <sup>38</sup> Maa nasawa adxa's jxpa'gaya' wa'lna adx pta'sxnıtxwa wa'lutxna nasa ewmeesa açewe'wete aça' txã'wê yũusa's Dxus Nçxi'k Nasa Yuusaawa Dxus angeleswe'sx yakh eena' kweethna kĩhçxa' jxpa'gaya' wa'luna jĩk.

## 9

<sup>1</sup> Txajũ' ki'kin we'weçxa' na'jĩk Jesusa':

—Isath we'we', ayte ũssa maafí yu' uumey uyuune'kwe Dxus naa kiwete jxkaajxa' kīini's jīk.

*Jesusa' zhiçxkwe yu'pthehçxa vxyaani  
(Mt 17.1-13; Lk 9.28-36)*

<sup>2</sup> Txajũ' seis en skhēwniite', Jesusa' thã'j walate pe'jna u'kh Pedro Jakobo Juan txãawe'sx tekhsaçxáatx. Kxtee pa'the', Jesus kakwe' fxiyku zhiçxkwe yu'ptheh txãawe'sx yafxte. <sup>3</sup> Txajx athni ropa' yãdx na'wēk zhiçxkwe çxihme yuu; naa kiwete maa yuhwa txã'wē zhiçxkwe çxihme yu' thethya' ãjãmeetxna. <sup>4</sup> Naapkaçxha' Pedrowe'sx yafxte vxyaatx Elias vxite' Moises. Txãawe'sxa' Jesus yakhtxi puutx we'wena ũsu'. <sup>5</sup> Aça' Pedro' txã'wē uyçxa', Jesusa's na'jīk:

—Ayte' kwe'sx ũswa'j wala ewa'. Aça' tekh wa' txajaga, teeçxsa' iidx jīi, vxite' Moises jīi, vxite' Elias jīi jīk. <sup>6</sup> Pedrowe'sxa' weçxaniite ũukhsa na'wētx neeyūu, txãasak Pedro' weçxaniite txã'wē we'we.

<sup>7</sup> Txajũ' tãaph kīhçxa aphku, aça' tãaph dxiiju na'wēk we'weni pthūuse:

—Na' adx Nçxi'k wala wedxnisa', aça' txã'sa' nwēesē'jna kxtey myuuwe jīçpkaçxha' <sup>8</sup> Pedrowe'sxa' thegu'gçxawa, Moiseswe'sxtxi uymeeta', naasáa Jesusçxáa yã'j ũstetx uy.

<sup>9</sup> Aça' thã'ju u'jweççxa', Jesusa' Pedrowe'sxtxi' wala neewe'wek:

—Ăçxhíi yu' maa yuhtxwa pta'sxmeene'kwe txã'wē uyni's, naasáa Dxus Nçxi'k Nasa Yuusáa uuçxawa ki' ĩtxĩ yuuniijũ pta'sxine'kwe.

<sup>10</sup> Txã'wě neewe'weni's kxtey nwēesē'jtx kim yuhtxwa tuuthe'jmée. Nawa txãawe'sx pwe'sx yu' puutx paapēyĩ'tx: Uuyã'jçxa', ¿ma'wě ki' ĩtxĩ yuukx? jĩna.

<sup>11</sup> Txajũ' na'wě kaapiya'jni'stxi Jesusa's paapējx:

—Dxus leya's kaapiya'jsawe'sxa' Elias khuē'y yaçte pa'jana jĩ'tx sa' ¿ma'wě yuuwa'jsakx açki'tx txã'jĩ'? jĩte', <sup>12</sup> Jesusa' na'wěk pta'sx:

—Isa, Elias khuē'y yuh yaçte pa'jçxa jxuka pheu'jwa'jsa yu'k aç'a' isa yuh pta'sxi'ne'ta. Txã'wěy Dxus Nçxi'k Nasa Yuusa's we'weçxa': wala pxthaa yuuna nasa ahçeçxa pkxuuni jĩna Dxus librute fxi'jni ũsa' txãawa isa yuja'.

<sup>13</sup> Elia'sa' pa'jana jĩ'tx aç'a' Elia'sa' pa'jyujk, nawa txã'sa' kījĩkĩhwa yũutx Dxus librute ma'wě fxi'jni ũsna txã'wěy.

*Teeçx luuçx wēeçxpa'jsa's Jesus nuykatxhini  
(Mt 17.14-21; Lk 9.37-43)*

<sup>14</sup> Txajũ' Jesusa' vxitesa neeyũutx kxtee sx-awedna kĩaçte', nasa wala pkhaakhena ũsu'tx. Aç'a' Dxus leya's kaapiya'jsawe'sx yu' txãawe'sx yakhtxi wala we'wena ũsu'. <sup>15</sup> Naapkaçxha' Jesus yuhtewa jĩimée ũsiyna, Jesus pa'jaçyã'the uyçxa', nasa' jxukaysa ũukh yajkxnatx weçxaya' utxáa. <sup>16</sup> Txajũ' Dxus leya's kaapiya'jsawe'sxtxi' Jesusa' pējxku:

—¿Kĩh yũupa'ga txakwe weeçx we'wena ũskwe? jĩte', <sup>17</sup> txãa nasa wala ksxavxyte teeçxsa' Jesusa's na'jĩnak pta'sx:

—Adx nçxi'ka's eçx luuku vxit-sa iiyamute' we'weya' ajã'çme' txã'snath ayte nuypa'j.

18 Txãa luuçxa' mtee ũstewa eçx luuku vxit yã'the', ki'thtxi ksuusu'jna yuwesu bu'çxçxáak sēhna weté'. Txã'wē yūuna wala talxiça'. Aça' idx yakh u'jusawe'sxtxi' pi'kxyã'th nuykatxhikahn, nawa ājāmeeta' jīte', <sup>19</sup> Jesus pasçxa':

—Dxusa' pu'çxhina sūhwa'j yu'sa' ji'phmeesata' naa nasa'. ¿Bagaçxpkaçx i'kwe'sx yakh pu'çxna ũs ya'watka? ¿Bagaçxpkaçx ājāmée fxi'ze ya'wakwe? Txãa luuçxa's mneejxūhwe ayte jīte', nuykūhtx Jesus tasxte.

<sup>20</sup> Aça' eçx luuku vxit-sa' txãa luuçxa's kaywēçxpa'ja'the', kiwesu wetek yuwesu bu'çxçxáa sēhna.

<sup>21</sup> Txajū' Jesusa' luuçx neya's pējxku:

—Txã'wē āçã'ni ¿makwe txaçx yuuçna? jīte':

—Le'çxiik txã'wē yu'. <sup>22</sup> Sa' maa entey yu' txaçxmeynak wēçxpa'jçxa ipxte khēena yu'khēwa khēena uupçxāh yuuna u'ju'. Aça' kxahth idx yakh ewupçxāhte', ma'wēçxáawa pu'çxhine'ga peeygāhçxa jīna pi'ki' jīte':

<sup>23</sup> —Idx yuu txã'wē Dxusa' pu'çxhina sūhte yu', kīhwa jxuka kxtey yuuna txã'wē yaakxsa's jīte',

<sup>24</sup> luuçx neya' susku we'wena pxthaa pi'kx:

—Dxusa' pu'çxyujuna sūju'th, sa' adx ũuste txã'wē yaakxwa'ja's jweeíçxáa wala meen kaa-jiyu'j jīk.

<sup>25</sup> Txajū' Jesusa' nasa wala kuh pkhaakhena utaaçte uyçxa', eçx luuku vxit-sa's na'jīnak we'we:

—Eçx luuku vxit-sa kwe'we'je'çmeeg, sa' wēsē'jwe'sxte thū'wētxwa aphgu, nawa āçxha' adx we'weni's nwēesē'jçxa ũusu mkaaseh,

peena yu' u'kameene'ga jīte', <sup>26</sup> eçx luuku vxit-sa' txāa luuçxa's sus kweeyi'jna kaywēçxpa'ja'jçxa kasejk. Aça' txāa luuçxa' uuníi na'wēk wetena neeyūu.

Kxahtx nasa we'weçxa':

—Ăçxha' pejka uuk jīna we'we'.

<sup>27</sup> Nawa Jesusa' kuseju pu'kisku, aça' txāa luuçxa' kiitek.

<sup>28</sup> Jesusa' txāajū u'jçxa', teeçx yattek u'ka. Aça' txāa yakh u'jusawe'sxa' pējxtxi:

—Kwe'sxa' çkīh yūuçxakxtha'w eçxa's kutxi'jya' ājāmée? jīte', <sup>29</sup> Jesusa' pta'sxku:

—Na'wēsa eçxa' thēymée yu' kasehmeena, wala yūunaana Dxus yakh puutx we'wete yuuçxāa kasejena jīk.

*Jesusa' txajx uuwa'ja's ki' pta'sxni*

*(Mt 17.22-23; Lk 9.43-45)*

<sup>30-31</sup> Txajū ki' u'jçxa', Galilea kiwenku u'j. Sa' kxteea' txāa yakh u'jusawe'sxtxik kaapiya'jwa'j ji'phu' naa pa'ga kim yuhwa jiyu jxthāasme'. Sa' dxi'the u'jweççxa', na'wēk txajx uuwa'ja's pta'sx:

—Dxus Nçxi'k Nasa Yuusá's nasa ewmeesa kusete dukhni yuuwa'ja', aça' txāawe'sxa' ikhetxna. Aça' uuçxawa, tekx ente' ki' itxī yuuna jītewa, <sup>32</sup> txāa yakh u'jusawe'sxa' jiyumeeta', nawa pējxya' yu' ũukhtxi.

*Kim wejx jxthaakwe jxtuhthesakx*

*(Mt 18.1-5; Lk 9.46-48)*

<sup>33</sup> Sa' Kapernaum çxhabte teeçx yatte pa'jçxa', txāa yakh u'jusawe'sxtxi paapējxku na'jīna:

—I'kwe'sxa' dxi'the yuhçxa', çkījke puutx we'we'? jītewa, <sup>34</sup> txāawe'sxa' thaameçxa

pasmeeta' txã'wẽ dxi'the yuhçxa', ¿maa wejx jxthaakwe walasakxtha'w? jĩna puutx we'weçxawa.

<sup>35</sup> Txajũ' Jesusa' docesatx pa'yaçxa kaççxa pta'sxku:

—Maatewa jxthaakwe walasa yuu wẽeçxa', iiwejçx yajxmeé maatxwa jxuka selpiçxa yuuçxáa jxthaakwe walasa yuuna. <sup>36</sup> Txã'jĩçxa' teeçx luuçxku'ẽ's txãawe'sx ksxavxyte txahçxa kusete yakhçxa na'wẽk we'we:

<sup>37</sup> —Maa nasawa adxna wa'lmée jxpa'gasa' adx na'wẽy luuçx na'wẽkwesatxwa ahçemée jxpa'gatxna. Txã'wẽ yũusa' adxna jxpa'gasaçxa txã'wẽ yuutxna. Sa' adxna jxpa'gasa' adxçxáana jxpa'gamée, adxna kaahsa'swa jxpa'gasa yu-utxna jĩk.

*Kwe'sxtxi açesamée yu' kwe'sx yakh fxi'zesatxna*

*(Mt 10.42; Lk 9.49-50)*

<sup>38</sup> Txajũ' Juana' na'wẽk pta'sx:

—Idx ¿ma'jĩki'g? Kwe'sxa' teeçx piçthẽ'j uytha'w txã' eçx luuku vxit-satx nasaa ũusu kutxi'ji'k Jesusku jxkaaja' jĩna we'weçxa. Nawa txã'sa' jwee yu' txã'wẽ yũukaahmeetha'w kwe'sx yakh u'jusame' naa pa'ga jĩte', <sup>39</sup> Jesus pasçxa':

—Txã'wẽ yũunuwe, txãa pa'gatey adx yase's kxsuusçxa eçx luuku vxit-satx nasaa ũusu kutxi'jsa' adxa's açewe'wemeena kim yuhwa. <sup>40</sup> Maawa kwe'sxtxi açewe'wesamée yu', kwe'sxtxi pu'çxsa íçxáatxna. <sup>41</sup> Na'jĩ'th na': I'kwe'sxa' Dxus luuçxi'kwe naapa'ga maawa



i'kwe'sxtxi peeygāhna teeçx tasa yu'çxáawa yusuna txã'sa' dewení yuuna.

*Pkalte kweete'jya'mée jxpa'yakxwa'ja'*  
(Mt 18.6-9; Lk 17.1-2)

<sup>42</sup> —Mpa'yajkxwe, txã'wēme' luuçxkuē adxa's yaakxsatx pkalte kweete'jena txã'sa' txhikhte skuutxh ũ'khni kweta's tudçxa ĩkh wala dxiikhē akhwaççxáa, wejx ewna. <sup>43</sup> Meeçxawa iidx kuse txã'wē pkalte idxa's kweete'jeçte', mespē'th. E'z kuse yakh uu kiwete khēe na'wē', wejxwa teeçx kuseçxáa ji'phçxawa pçumée ĩtxĩ fxi'zewa'the u'kani wejx ewa'. Txã'wēme' uu kiwete ipx wala seena'sa bagaçxte yuhwa ũçxhawa'jsame'. <sup>44</sup> Kxteea' bagaçxte yuhwa wesa' çxhavxyna pçuwa'jsameeta', aça' ipx seena'sawa ũçxhawa'jsame'. <sup>45</sup> Txã'wēy iidx çxidawa pkalte kweete'jeçte', txã'swa mespē'th. E'z çxida yakh uu kiwete khēe na'wē', wejxwa teeçx çxidaçxáa ji'phçxawa pçumée ĩtxĩ fxi'zewa'the u'kani wejx ewna. Txã'wēme' infxiernote ipxa' bagaçxte yuhwa ũçxhawa'jsame'. <sup>46</sup> Kxteea' bagaçxte yuhwa wesa' çxhavxyna pçuwa'jsameeta', aça' ipx seena'sawa ũçxhawa'jsame'. <sup>47</sup> Txã'wēy iidx yafxwa pkalte kweete'jpçxāh yuuçte', mkuutxi'j. E'z yafx yakh infxiernote khēe na'wē', wejxwa teeçx yafx yakhçxáawa Dxus jxkaahna ũsnite u'kani wejx ewna. <sup>48</sup> Txã'wēme' kxteea' bagaçxte yuhwa wesa' çxhavxyna pçuwa'jsameeta', aça' ipx seena'sawa ũçxhawa'jsame'. <sup>49</sup> Txãa pa'gatey txãa ipxa' kaapçu'ju'jwa'jsame'.

<sup>50</sup> Nega' wala seelpisa'. Nawa sxūukāhte', ¿ma'wē kselpi'jya' ewuutxki? I'kwe'sxa' nega na'wēy selpiina mfxi'zewe, jxukaysa yakh ewçxáa.

## 10

*Ptamsa txuteewa'jme's Jesus kaapiya'jni  
(Mt 19.1-12; Lk 16.18)*

<sup>1</sup> Jesusa' Kapernaum çxhabu kasehçxa', Judea kiwen vxite' Jordan yu'wala kutenku u'j kxsū pekūjxa'. Sa' Jordan yu'wala kuteju ūste', wala nasa pkhaakhe'tx txajx ūsnite. Aça' kxteewa kaapiya'ja'kh vxite ahsū na'wēy.

<sup>2</sup> Naapkaçxha' fxariseowe'sxa' Jesus tasxte utx-aaçxa' na'wētx paapējx, pasya' sxiigte' ewméé vxit-ya' sūhçxa:

—Ptamsaçxawa, nyu's wāatāhte ¿ewmanx? jīte', <sup>3</sup> Jesus pasçxa':

—Jiimeewá'kwe Moises jxkaahni's jīna pējxte', <sup>4</sup> txāawe'sx pasçxa':

—Moises jxkaahçxa', nyu's wāatājxa' ewuweçxte', nyu kazx yuuna fxi'zeni's eçte fxi'jçxa dukhçxak txuteekaja' jīte', <sup>5</sup> Jesus pasçxa':

—Moisesa' txā'wē yūuwa'ja's nvxiht yujk, nawa peekx nyu kīhwa yūumeetewa wāatāhna fxi'zepa'ga íçxáak txā'wē yūuwa'ja's nvxiht, peekxçxáa yu' wāatājxa' ājākahmén. <sup>6</sup> Nawa Dxusa' nyafxiitey naa kiwe's pheu'jji e'zúitx ja'daçxajk vxit piçthē'j petx u'y yā'jçxa. <sup>7</sup> Aça' txāa pa'ga piçthē'ja' peekx neywe'sx tasxu txuteewa'jsa', nyu yuuwa'jsa yakh utxaaya',

<sup>8</sup> txã'wẽ e'zçxawa, teeçxsaçxáa na'wẽ yuuna pa'jya'. Aça' txã'wẽ yũuniijũ' e'zmée teeçxçxáak yuuna pa'ja'. <sup>9</sup> Txãa pa'ga Dxus pũpxçxa nvxiitni ptamsayã'txhi' kim yuhwa txuhdeya' ãjãwa'jsameeta' jĩk.

<sup>10</sup> Txajũ' Jesusa' teeçx yatte u'kate', txãa yakh u'jusawe'sxa' txã'wẽ pta'sxni's ki' pějxtxi. <sup>11</sup> Aça' Jesusa' pta'sxku:

—Maa piçthẽ'jwa peekx nyu's wãatãhçxa vxite yakh ptamuuçxa', pkalte weteena, peekx nyu's wãatãhçxa vxite yakh ptamuupa'ga. <sup>12</sup> Aça' u'ywa txã'wẽy nmi'a's wãatãhçxa vxite yakh ptamuuçxa', txãawa pkalteyçxáa weteena peekx nmi'a's wãatãhçxa vxite yakh ptamuupa'ga jĩk.

*Luuçxkuẽtx Jesus bedekĩyni*  
(Mt 19.13-15; Lk 18.15-17)

<sup>13</sup> Txãa e'su' Jesus tasxte luuçxkuẽtx nuypa'jtx Dxus kusete neewe'wekahn. Aça' Jesus yakh u'jusawe'sxa' yuptxi luuçxkuẽtx nuypa'jsatx. <sup>14</sup> Txã'wẽ yũute', Jesusa' na'jĩnak ũusçxa we'we:

—Luuçxkuẽ adx tasxte yuusaatxi' kuçx yup-nuwe, txãa pa'gatey Dxus jxkaahna ũsnisa' naa luuçxkuẽwe'sx na'wẽsa jĩi íçxá'. <sup>15</sup> Na'jĩ'th na': maawa luuçxkuẽ na'wẽ Dxus jxkaahwa'j ena's wa'lmée jxpa'gameeçxa yu', bagaçxte yuhwa Dxus tasxte u'kaya' ãjãmeetxna. <sup>16</sup> Txã'jĩna'wa luuçxkuẽtx yakhna' dxikthesu peekizeçxa Dxus kusete neewe'wek.

*Piçtakx wala ji'phsa Jesus yakh puutx we'weni*  
(Mt 19.16-30; Lk 18.18-30)

17 Txajũ' Jesusa' vxite ahn u'jweçte', teeçx piçtakx dxi'the wuwuuna kũhçxa', Jesus tasxte peejxũkwek na'wẽ paapẽjxna:

—Kaapiya'jsa wala ewsa mpeeta'sx. Adxa' ħma'wẽ yũuçxa pçuwa'jmée ĩtxĩ fxi'zewa'ja's ji'phuki'th? jĩte', 18 Jesus pasçxa':

—ĤKĩh yuupa'gaga adxa's ewsa jĩ'? Naa kiwete' teeçx nasaçxáa yuhwa ewsa yu' meeta'. Dvus yuuçxáa ewsa ũsa'. 19 Idxa' jiine'ga Dvus jxkaahni na'wẽsatxi': Ptamsa' vxite yakh pkal yuuwa'jme', nasa ikhwa'jme', pesweewa'jme', vxitetx ĩxiina nuywe'wewa'jme', vxitee jĩitx kusa'jwa'jme'. Neywe'sxtxi peeğãhna ewçxáa yũuna fxi'zewa'ja' jĩte', 20 txáa piçtakx txã'wẽ wẽsẽ'jçxa' na'wẽk pas:

—Txã'wẽ jxkaahnisatxi' le'çxkuẽjũjx jxuka kxtey yuunath waláa jĩte', 21 Jesusa' txáa piçtakxa's peeğãhna theğçxa' na'jik:

—Na'wẽ yũuwa'jçxáa peejxa': Iidx ji'phuni's jxuka txweyçxa, puuple ji'phmeesatx peesya' me'j. Txã'wẽ yũuçxa', cielute ji'phsa yuune'ga. Txã'wẽ yũuçxa adx yakh myuh, makwe seena' nxussa pa'thewa txáatxi' yajxnmée jĩte', 22 txáa piçtakxa' wala ji'phsa yu'k, sa' txã'wẽ wẽsẽ'jçxa', wala nxusna u'kh.

23 Txajũ' Jesusa' nasatx theğçxa' pta'sxku txáa yakh u'jusawe'sxtxi:

—Maawa wala ji'phsa yakha' Dvus jxkaahna ũsnite u'kawa'j wala yuh thẽya' jĩte', 24 txáa yakh u'jusawe'sx wẽsẽ'jçxa', jiyumée kuh jwed yajxnatx neeyũ. Aça' Jesusa' áatek pta'sx:

—Naa kiwete' ji'phuniçxá's jxthaakwe yaakxsa yakha' wala yuh thẽya' Dvus jxkaahnite

u'kawa'ja'. <sup>25</sup> Maawa wala ji'phsa' Dxus jxkaahnite wala thëy u'katxna. Aça' txã'wë thëysa's yajkxte yu', kamelxo yuhwa thëymée wáa yūz kafxga u'kaya' ājātxna jīk. <sup>26</sup> Txã'wë wēsē'jçxa', wala kuh yajkxna na'wēt̄x puutx paapēyi':

—Txã'wēte', ji'phsa' çkimçxá' cielute u'kaya' ājama'tx? jīte', <sup>27</sup> Jesusa' txãawe'sxtxi thegçxa' na'wēk we'we:

—Naa kiwete nasa' Dxus ūsnite u'ka wēeçxa txãawe'sx kakwejuçxáa pa'pçxuçxa' ājāmeetxna. Nawa Dxusna pi'kçxa yu', thëymée ājātxna. Dxus yakha' kīh yuhwa thëysa meea'.

<sup>28</sup> Txajū' Pedro' na'wēk we'we:

—Kwe'sxa' idx yakh yujxa', kwe'sx ji'phuni's jxuka nvxihttha'w kīhnawa jīte', <sup>29</sup> Jesusa' na'wēk pta'sx:

—Adxa' isath we'we': Dxus yuwe ewsa's jxpa'gaçxa adx yakh fxi'ze wēeçxa', kīhnawa jxuka nvxiitutxna yat, kiwe, nyakhwe'sx, npe'sxwe'sx, neywe'sx, nyu, nçxi'kwe'sx, niisawe'sx txã'wēsatsx. <sup>30</sup> Aça' txã'wë yūusa' makwe yahçena fxi'zeçxawa txãawe'sx nvxiitniite puutejka jxthaakwe wala uyuutxna naa kiwete'y: yat, kiwe, nyakhwe'sx, npe'sxwe'sx, njī'jwe'sx, nçxi'kwe'sx, niisawe'sx txã'wēysatsx. Sa' vxite kiwete', pçumée itxī fxi'zewa'ja's jxpa'gatxna. <sup>31</sup> Nawa jxpa'yakxmeete', makwe yaçtewe'sxçxawa, nmehtewe'sx yuutxna; naapkaçxha' nmehtewe'sx yu', yaçtewe'sx yuutxna jīk.

*Jesusa' txajx uuwa'ja's ki' pta'sxni*  
(Mt 20.17-19; Lk 18.31-34)

<sup>32</sup> Jesusa' Jerusالente pa'jya' u'jweçku yu', aça' txãa yakh u'jusawe'sxa' ũukhçxa e'stetx u'jwe' Jesusa's yaçte akhçxa. Txajũ' Jesusa' doce-saçxáatx fxiite pa'yaçxa pta'sxku txã'sa' kñh yũuya'watewa:

<sup>33</sup> —I'kwe'sxa' jii yã'ji'kwe Jerusالente pa'jya' u'jweçtha'w. Aça' kxte' Dxus Nçxi'k Nasa Yuusa's uweçxa dukhni yuuna Dxus leya's kaapiya'jsawe'sx vxite' sacerdote npiiçthẽ'jwe'sx kusete. Aça' txãawe'sxa' ikhwa'j vxitçxa judiu ji'jmée vxite nasatx dukhetxna ikhkahn.

<sup>34</sup> Aça' txãa nasa' npeevxysxijkana peçxujkwena fxne'sx avxythethna txã'wẽ yũuçxa ikhetxna. Nawa tekñ ente' ki' ãtxĩ yuuna jñk.

*Jakobowe'sx njĩ'j Jesusa's pẽyni*  
(Mt 20.20-28)

<sup>35</sup> Txajũ' Zebedeo nçxi'kwe'sx Jakobo vxite' Juan txãawe'sxa' Jesus tasxte utxaaçxa na'wẽtx pẽjx:

—Kwe'sxa' idxa'stha'w pẽyi' kwe'sx pẽyni's kxtey yuukahn jĩte', <sup>36</sup> Jesusa' pẽjxku:

—¿Kĩjke yũu jxthãasu'? jĩna.

<sup>37</sup> Aça' txãawe'sx e'zsa' na'wẽtx pẽjx:

—Idxa' naa kiwete jxkaajxa' kñhçxa', kwe'sx e'zsatx iidx pukakhẽ pdxi'p kaçxwa'ja's ũsune'ga jĩnatx pẽjx. <sup>38</sup> Aça' Jesus pasçxa':

—I'kwe'sxa' jiimeeçxa i'kwe txã'wẽ pẽyi'. I'kwe'sxa' adx na'wẽy pxthaa yuuçxa uuwa'ja's ũukhmée jxpa'gaya' ¿ãjama'kwe? jĩna pẽjxte', <sup>39</sup> txãawe'sxa':

—Āja'nja'w jĩnatx pas.

Aça' Jesusa' na'wěk pta'sx:

—Isa, i'kwe'sxa' adx na'wěy pxthaa yuuçxa uuwa'ja's ũukhmée ji'phuyujune'kwe. <sup>40</sup> Nawa adx pukakhě pdxi'p kaçxwa'ja's adx ũsu'çmeeth pěysatx. Txã'sa' txãn ente kim jxpa'gawa'jsa yuuna txã'sçxáa ũsni yuuna jĩk.

<sup>41</sup> Aça' vxite diezsawe'sx txã'wě Jakobowe'sx pěyni's wěsě'jçxa' ũusaçxatx txãawe'sxtxi'.

<sup>42</sup> Txã'wě yũute', Jesusa' pa'yaçxa na'wěk yu'kxpeh:

—I'kwe'sxa' miiyajkxwe: Naa kiwete jxkaahsa walasa' nasatx jxuka jxkaaja'tx juuna'çxáa yuuna khaawásxi'jna. <sup>43</sup> Nawa i'kwe'sxa' txã'wěy yuuwa'jsameei'kwe. Makwe jxthaakwesaçxawa, wejxwa vxitetx selpiina mfxi'zewe. <sup>44</sup> I'kwe'sxa' walasa yuu wěeçxa', vxitee jxkaahni selpisáa myuuwe. <sup>45</sup> Txãa pa'gatey Dxus Nçxi'k Nasa Yuusáa yuhwa txã'sna selpíi jxthãasya' kĩhme', wejxwa maazkuée nasatxwa nwe'wena selpiia' kĩhçxak ya'dukh nxuste uuya'.

*Teeçx piçthě'j uyya' ājāsame's Jesus nuykatx-hini*

*(Mt 20.29-34; Lk 18.35-43)*

<sup>46</sup> Txajũ' Jerikote pa'jçxa', Jesusa' txãa yakh u'jusawe'sx vxite' kuhsa yakh çxhabu kasehna u'jweçte', teeçx piçthě'j uyya' ājāsameek dxi'j pukate lmusxnu thãasna u'pu'. Txã' Bartimeok yaase yu', Timeo nçxi'k. <sup>47</sup> Sa' Jesus Nasarethuwe'sx utxaaçte wěsě'jçxa', na'jĩnak sus we'wena u'pu':

—Jesus, Davxid ji'j, adxa's meen peeygãh jĩna.

48 Aça' nasa yu':

—Sxuuna' myuu, kuçxgu susu' jïtewa, jweeíçxáak sus we'we:

—Davxid ji'j, adxa's meen peeygãh jïna.

49 Txajũ' Jesusa' tudte yujuçxa, pa'yakaakh. Aça' pa'yatx na'jïna:

—Kiiteçxa ũukhmée myuh, Jesusa' idxa's pa'yaça' jïçpkaçxha', 50 txajx atxha's nvxihtçxa ũphçxak kiiteçxa Jesus tasxte utxáa.

51 Txajũ' Jesusa' çkĩhga yũu jxthãasu'? jïna pějxte', txáa uyya' ájãsamée pasçxa':

—Adxa' uyya' ájã wějē'th jïk.

52 Aça' Jesus we'weçxa':

—Kaauyu'juna sũhçxane'ga adxa's pi'kx txáa pa'ga açxha' uyna mneeyũu jïçpkaçxha' uyya' ájãk, sa' Jesus e'stey u'kh pi'kxna.

## 11

### *Jesus Jerusalente u'kani*

(Mt 21.1-11; Lk 19.28-40; Jn 12.12-19)

1 Txajũ' Jesusa' Jerusalenna u'jweççxa', e'z çxhabkuẽ Betania Betfxagé utxatek pa'j. Txáa çxhaba' Oliwos vxiç dxi'pgatx neeyũ'. Aça' kxtee pa'jçxa' txáa yakh u'jusawe'sx e'zsatx yaçte kaakh na'jïna:

2 —Çxhab le'çxkuẽ vxya'k kxtee me'jwe. Sa' kxtee pa'jçxa', teeçx buçxu kim yuhwa a'jnimeesa tudni ũsna txã'sna jxũkhwedeçxa jxũna yuweene'kwe. 3 Txã'wē yũuçte kim pēyiwáatxna aça' kwe'sxtxi jxpe'jsak nikxya' kaah nawa ki' kaasxwedu'juna jïne'kwe.

4 Txã'jïte', txáawe'sxa' u'jçxa buçxu's uytxi



vxitx pukate dxi'j ju'gu tudni ũste. Aça' jxūna u'jya' jxūkhwedeçtxi yu'. <sup>5</sup> Naapkaçxha' kxtee thegna ũssa' we'wetx:

—Buçxu's çkĩh yūuya' jxūkhwedeçkwe? jĩna.

<sup>6</sup> Txajũ' Jesus ma'wēne' kwe'we'j txã'wēy txãawe'sxa' pasteçxáa jxūna kahtx. <sup>7</sup> Txajũ' txãa buçxu's Jesus tasxte nuykūhçxa', txãawe'sx atxhtxi tpegu'gçxa pustxi, aça' Jesusa' a'jçxa u'kh. <sup>8</sup> Naapkaçxha' vxite yu' Jesus u'jwa'j dxi'jsu yaçtetx txãawe'sx atxhtxi pusna u'jwe', aça' vxite' ējxã spē'thçxatx txã'wēy dxi'jsu pusna u'jwe' yaçsu. <sup>9</sup> Naapkaçxha' yaçte u'jsa vxite' e'ste yuusa txãawe'sxa' na'jĩnatx weyna u'jwe':

—Dxus kaahnisa wala yuh jxtuhthesa yuja'. <sup>10</sup> Wala yuh ew jxkaajana, kwe'sx yaçgawe'sx Davxid na'wēy. Dxusa's weçxaaga wala ew yūupa'ga jĩ'tx. <sup>11</sup> Jesusa' txã'wēk Jerusalente u'ka dxuus yatte pa'j. Sa' dxuus yatte kĩh ũstewa jxuka thegçxaçxáa ki' kasehna u'kh Betania çxhabnay doce txãa yakh u'jusawe'sx yakh, kusuçyã'kh yu' naa pa'ga.

*Higwera fxtũu tasx yũnsame's Jesus açewe'weni*

*(Mt 21.18-19)*

<sup>12</sup> Txajũ' kuskuskhē' Jesusa' Betania çxhabu ki' kasehçxa' wēek. <sup>13</sup> Sa' higwera-tasx wala yehçsa ũste uyçxa', thegya' u'kh yũn ji'phwáana sũhçxa. Nawa yũnmée eççxáak ji'ph yu', yũn en meek yu' naa pa'ga. <sup>14</sup> Txajũ' Jesusa' na'jĩnak we'we txãa fxtũu tasxa's:

—Naa fxtūu tasxte yūnni's kim yuhwa ũ'meetxna peena yu' jīna we'weçte', txāa yakh u'jusawe'sxa' wēsē'jnatx ũsu'.

*Dxuus yatte txweysaatx Jesus kasxisxni*  
(Mt 21.12-17; Lk 19.45-48; Jn 2.13-22)

<sup>15</sup> Txajū' Jesusa' Jerusalem çxhabte ki' sx-awedna pa'jçxa', dxuus yatte u'kaçxa kxtee kījkihwa txweyna ki' weyna ũssatx eka kasxisxku, vxuyu yu'pthehsa mesa vxite' tub çxihme txweysa kaçxni pagutx jxuka pūsxna. <sup>16</sup> Sa' kxtee kījkihwa tu'sçxa pa'jsatx kaakūju'jme'. <sup>17</sup> Txajū' na'jīnak yu'kxpeh:

—Dxus librute' na'wē fxi'jni ũsa': Adx yata' Dxus yakh puutx we'wena ũswa'j yatçxá' nasa majūwe'sxwa jī'k. Nawa i'kwe'sxa' peswée pkhaakhena ũsni kafx na'wēçxáa vxitçxa jī'phi'kwe jīte', <sup>18</sup> Dxus leya's kaapiya'jsawe'sx vxite' sacerdote npiiçthē'jwe'sx wēsē'jçxa', ma'wēçxáawa yūuçxa ikhya' ājāwa'ja's pakwetx. Nawa isa ikhya' yu' ũukhtxi, nasa thaakwe kuhsa yu' Jesus kaapiya'jni's nwēesē'jsaçxaçxáa ũspa'ga. <sup>19</sup> Txajū' jxuka çxhi'dxiçte', Jesusa' txāa çxhabuh kasehna u'kh.

*Higwera fxtūu tasx udxni*  
(Mt 21.20-22)

<sup>20</sup> Kuskuskhē kusii kxuy jxkhēuuççxa', higwera fxtūu tasxa' weçete pa'j udxni ũstetx uy.

<sup>21</sup> Aça' Pedro' Jesus we'weni's yajkxçxa na'jīk:

—Mtheg naa higwera fxtūu tasxa's jū'na we'weçxa': naa fxtūu tasxte yūnni's kim yuhwa ũ'meetxna peena yu' jīnag we'we txāa fxtūu tasxa' jxuka uhdxga jīte', <sup>22</sup> Jesusa' na'wēk pas:

—I'kwe'sxa' kīh pēyiççawa, kuh jwed yajxmée Dxusa' kxtey yuuna sūhnaçxaa mpējxwe. <sup>23</sup> Adxa' isath we'we': maawa Dxusa's txā'wē ūsuh jxuka yajxna, naa vxiç wala ayjxu u'jçxa īkh walate me'j khēeya' jītxna aça' kxtey yuuna. <sup>24</sup> Kxtey yuuwa'ja's adxa' jiiçxath txā'wē i'kwe'sxtxi' Dxus yakh puutx we'wekaja' pēyni's jxpa'gayā'tha'w sūhna. <sup>25</sup> Sa' Dxus yakh puutx we'wena ūsīi yaakiwá'kwe vxitesa yakh āhmée yūuni's. Sa' txā'wē yajkçxa', txāa yakh peltunāyya' u'jwene'kwe, kxah i'kwe'sx Tata cielutewe'sxwa i'kwe'sx pkaltxi peltunaīna. <sup>26</sup> Nawa i'kwe'sx txā'wē vxitesa yakh āhmée yūuni's peltunaīmeete', i'kwe'sx Tata cielutewe'sxwa i'kwe'sx pkaltxi' peltunaīmeena jīk.

*Dxuus yatte Jesus juuna' yūuni's pēyni  
(Mt 21.23-27; Lk 20.1-8)*

<sup>27</sup> Txajū' Jerusالente sxawedna pa'jçxa, dxuus yat-su u'jute', sacerdote npiiçthē'jwe'sx vxite' Dxus leya's kaapiya'jsawe'sx vxite' judiu nthē'jsawe'sx Jesus tasxte utxaaçxa', <sup>28</sup> na'jīnatx pējx:

—Idxa' ¿kinga saga dxuus yatte txā'wē juuna' yūu? ¿Kinga txā'wē yūuya' jxkaah? jīte', <sup>29</sup> Jesus paççxa':

—Adxwa i'kwe'sxtxi' pējx ya'wath aça' adx pēyni's pasune'kwe. Txā'wē yū' adxwa pta'sxi'nja kim jxkaathe txā'wē yūuçxawa. <sup>30</sup> Sa' pējxku na'jīna:

—Juan Bautista's ¿kinga jxkaah bautisãyya'? ¿Dxusá', meeçxa' naa kiwega piçthê'já'? Mpaaswe jĩnak pějx.

<sup>31</sup> Txajũ' txãawe'sx pwe'sx na'jĩnatx puutx we'we':

—Dxusne' jxkaah jĩ'nja'w aça' txã'wête' ¿mjĩya'kwe Juan pta'sxni's jxpa'gamée? jĩna pasuna. <sup>32</sup> Meeçxa' naa kiwetewe'sxne'ta jxkaah jĩwaçwa, kxul yuhna, nasa jxukaysa Juana's we'weçxa': Dxus jxkaahnisa' jĩ'tx. <sup>33</sup> Txã'jĩna ũukh we'weçxaçxáa:

—Kwe'sxa' jĩimeetha'w jĩnaçxáatx Jesusa's pas. Aça' Jesusa' na'jĩk:

—Adxwa pta'sxme'nja kim jxkaathe txã'wê yũuçxawa jĩk.

## 12

*Mjĩsawe'sx patron nçxi'ka's ikhni yakh kaaja'da'jni*

*(Mt 21.33-46; Lk 20.9-19)*

<sup>1</sup> Txajũ' Jesusa' naa ejemplo yakhku kaaja'da'jna pta'sx:

—Teeçx piçthê'ja' txajx kiwete uwa wala uhçxa, ktadxíi jxuka uphku, sa' uwa ee thegwa'j yatwa txahçxa uwa thê'the ũhdeçxa ku'swa'j yatwa fxii txajk. Txã'wê yũuçxak txãa kiwete mjĩwa'jsatx ew neewe'wena nvxihtçxa jxu'j kiwen u'j. <sup>2</sup> Txajũ' uwa thê'jwa'j en ähte', txã'sna selpisáa teeçx kaakh kxtee mjĩsatx pějxya' txãa jĩi yuuwa'ja's. <sup>3</sup> Nawa txãa kiwete mjĩsawe'sxa' pějxna pa'jsa's uweçxa wala pkxuutx, sa' kĩh yuhwa dukhmeetx kaah. <sup>4</sup> Aça' kiwe namu' vxite

selpisáa ki' kaakh txã'snawa wala wēesxuna kwet wāatātāhna dxikthesu kpã'vxittxi. <sup>5</sup> Txajũ' kiwe namu' ki' kaakh vxite selpisáa, aça' txã'sa' ikhtxi. Txāa e'su' maazkuēe selpisaawa kaakh, aça' txāawe'sxtxi' maaíi yuutxi' kpã'vxitna, vx-itetxi' ikhtxi.

<sup>6</sup> Txã'wē yūute', teeçx nçxi'k wala wedxnisa ji'phuk txã'snak nmehte kaah, adx nçxi'ka's pejka nwēesē'jetxna sūhna. <sup>7</sup> Nawa txāa kiwete mjīisawe'sxa' txāa nçxi'ka's uyçxa': Naa nçxi'k txã'wē naa kiwe's uwewa'jsana, aça' txã'sa' ikhçxa kiwe's kwe'sx iiyamu'nja'w jīnatx puutx we'we. <sup>8</sup> Sa' txāa nçxi'ka's uweçxa ikhçxa uuníi kakwe's txāa kiweju kutxi'jtx jīnak pta'sx.

<sup>9</sup> Txã'wē pta'sxçxa Jesusa' pějxku:

—Txã'wē yūute', kxtee kiwe namu' çkīh yūukx? Txāa sxawedna pa'jçxa, kxtee mjīisatxi's ikhçxa kiwe's vxitetx ūsuna sūju'th jīk.

<sup>10</sup> Dxus libroute na'wē fxi'jni ūsa' txã'sa' iilēeymeewá'kwe i'kwe'sxa':

Yat txaahsawe'sxa': Naa kweta' seelpime' jīçxa wāatāhtx.

Nawa txāaíik yat makwesananawa çxhāçxha neewewa'jsa yuuna pa'j.

<sup>11</sup> Txã'wē neewewa'jsa yuuna pa'jwa'ja's Dxusku vxitçxa nvxiht,

Txāa pa'ga kwe'sx yakha' wala weçxa yuja' çjī'çmeena'?

<sup>12</sup> Txajũ' Dxus leya's kaapiya'jsawe'sx vx-ite' sacerdote npiiçthē'jwe'sxa' txāa ejemplo' txāawe'sxtxi we'wenitewa jiyuçxa', Jesusa's

uweçxa tud wēetx. Nawa nasatx ũukhçxa tudméé u'jtx.

*Gobierno's dukhwa'ja'swa pēyni*  
(Mt 22.15-22; Lk 20.20-26)

<sup>13</sup> Txajũ' fxariseowe'sx vxite' Herodes nasa txãawe'sxtxi pa'yaçxatx maz kaah Jesus tasxte, kīh ewméé we'wetewa kpajkxya'. <sup>14</sup> Aça' txãawe'sxa' na'wētx paapējx Jesusa's:

—Idxa's kwe'sxa' jiitha'w. Idxa' isasaçxá'sgu we'we', Dxus tasxte pa'jwa'j dxi'ja's kaapiya'jna. Sa' nasaa jxkaahna yu'kxpehnitx nwēese'je'çmeeg, txãa pa'gatey idxa' nasa ewsa na'wē thegsatx jiyumey ju'gu yu'çmeeg. Idx ¿ma'jīki'g? Jxkaahsa Cesara's vxyu dukhte ¿ewmanx? Meeçxa' dukhmeete wáa ¿ewna? jīna pējxte', <sup>15</sup> Jesusa' txãawe'sx ũuste ewméé yajkçxa txã'wē pēyni's jiyuçxa', na'wēk pas:

—¿Kījxa'kwe adxa's ewmeete nvxiit wēeçxa txã'wē pēyí'? Vxyu's mneejxūhwe wakx, thegya'wath jīte', <sup>16</sup> teeçx vxyu's jxūna kūhtx, aça' thegçxa' na'jīk:

—Ayte' ¿kiim dxi'pa's ki'pnina, sa' kiim yase's fxi'jnina? jīte', txãawe'sx pasçxa':

—Cesar dxi'pa's ki'pçxa Cesar yase's fxi'jni' jītx.

<sup>17</sup> Aça' Jesusa' na'wēk jxkaah:

—Cesar jī's Cesara's dukhwa'ja', sa' Dxus jī's Dxusa's dukhwa'ja' jīte', paapēysawe'sxa' pasya' ājāmée kuh yajkxnatx neeyūu.

*Uusaawe'sx ki' itxi yuuwa'ja'swa pēyni*  
(Mt 22.23-33; Lk 20.27-40)

<sup>18</sup> Txajũ' saduceowe'sxtxi paapējxya' kūh Jesus tasxte. Txãawe'sxa' uusaawe'sxa' peena yu' itxī

yuumeetxna sũhna yaakxsatx yu'. Sa' Jesus tasxte kũhçxa', pějxtxi:

<sup>19</sup> —Idxa' jiine'ga, Moisesa' na'wěk fxi'jçxa nvxiht: Maa piçthě'jwa nyu ji'phçxawa, luuçx ji'phumey uute', uusáa nyakha' txãa neeyũusáa u'y yakh kabaana aç'a' txãate luuçx nyafx-tewe'sxa' uusáa nçxi'k na'wě neeyũuna jĩnak fxi'j.

<sup>20</sup> Kwe'sxa' jiitha'w siete piçthě'j pxakhtxi u'p yu'. Sa' nyakh nthě'jsa' iyyuuçxawa luuçx ji'phumey uuk. <sup>21</sup> Aç'a' nyakh e'stewe'sxa' txãa u'y neeyũusáa yakh kabaçxawa, txãawa luuçx ji'phumey uuk. Sa' tekhtewe'sx nyakhwa txãa u'y neeyũusa's iíçxáak kaba. Nawa txãawa txã'wěyçxáak yuu. <sup>22</sup> Aç'a' sietesay teeçx u'ysaçxaçxáana kabana jxã'jçxawa, txã'wěçxaçxáatx yuu. Nmehte' txãa u'ywa uuk. <sup>23</sup> Aç'a' uusaawe'sx ki' itxĩ yuu ente', txãa u'ya' ç'maa yakh isa nyu yuuwa'jsakx cielute'? jĩnatx paapějx. <sup>24</sup> Aç'a' Jesusa' na'wěk pta'sx:

—I'kwe'sxa' Dxus libru's jiimeei'kwe, sa' Dxus tasxte ma'wě fxi'zewa'ja'swa jiimeeçxa' jxpubana ũsi'kwe. <sup>25</sup> Nawa uusaawe'sxa' ki' itxĩ yuuçxa', nyu ji'phuwa'jsa meeta'. Kxte' kaap-tamu'jna ũskiweme', txãa pa'gatey cielute' txãawe'sxa' angeleswe'sx na'wěsaçxáa yã'tha'. <sup>26</sup> I'kwe'sxa' jxpubanuwe: Uusaawe'sxa' ki' itxĩ yuuwa'jsa yuhta'. I'kwe'sxíwa Moises librute iilěeyne'kwe: Kxte' çhũçh yu'kh behna ũsni pxãjũ na'wěk Dxusa' we'we: Adxa' Abraham, Ísaak, Jakob txãawe'sx Dxusthu jĩk. <sup>27</sup> Dxusa' uusaawe'sx Dxusme', txã' itxĩsawe'sx Dxusa'. Aç'a' i'kwe'sxa' wala jxpubana ũsi'kwe jĩk.

*Dxus ley maatewa jxthaakwesa  
(Mt 22.34-40)*

<sup>28</sup> Txã'wē pāapējxte', Jesus sxiigmée pasuçte wēsē'jna ũsu'k Dxus ley kaapiya'jsa teeçxsa'. Sa' txãawa na'wēk pējx:

—Dxus leya' maatewa jxthaakwesa' ¿maana? jīte', <sup>29</sup> Jesusa' pta'sxku:

—Dxus ley maatewa jxthaakwesa nyafxtewe'sxa' na'wē': Israelwe'sx, mwēsē'jwe: Kwe'sxtxi taki'sa Dxusa' teeçx yuuçxá'. <sup>30</sup> Txã'sa' ũusuh jxuka yajkxçxa txãa yuuçxáana selpiina fxi'zewa'ja' bagaçxte yuhwa txutemée uu entepkaçx. <sup>31</sup> Aça' e'stewe'sxa' txã'wēydxia': Peekii ma'wēga ya'peeygāja', txã'wēy mpeeygāh vxite nasatxwa. Naa ley e'zsa maatewa jxthaakwesata' jīte', <sup>32</sup> Dxus leya's kaapiya'jsa pasçxa':

—Ew yuh pta'sxgu. Dxusa' teeçxçxáa yuh ũsa', aça' vxite Dxus yu' meeta'. <sup>33</sup> Sa' txã'wē ũusuh jxuka yajkxçxa txãa yuuçxáana bagaçxte yuhwa txutemée selpiina fxi'zeçxa, txã'wēy ma'wē peekii ya'peeygāja'kx txã'wē vxite nasatxwa peeygāhna fxi'zeni' Dxusna peesna maazkuēe niimalwa altalte kabnite jxthaakwe ewsa' jīk.

<sup>34</sup> Txajū' Dxus leya's kaapiya'jsa txã'wē jxpa'yakx paste', Jesusa' na'jīk:

—Dxus jxkaahnite u'kaya' utxa ũsgu jīk.

Aça' txajūyā'ja' vxite yu' peena pējxmeeta'.

*Dxus tasxu yuusa' ¿kiim nçxi'kki? jīna Jesus  
pēyni*

*(Mt 22.41-46; Lk 20.41-44)*



<sup>35</sup> Txajũ' Jesusa' dxuus yatte nasatx kaapiya'jna na'wêk pta'sx:

—Dxus ley kaapiya'jsawe'sxa' ħma'wêteki'tx Kristo' Davxid nçxi'ka' jĩna pta'sxi'?

<sup>36</sup> Naapkaçxha' Dxus Espiritu kaayaki'the' Davxida' Kristo's we'weçxa' na'jĩk:

Adxna jxpe'jsa Kristo's Dxusa' na'jĩk:

Adx pukate paçu ju'gte mkaaçx,

Idxna açesatx idxçxaçxáana nwêese'jwa'ja's vx-itna jxã'phkaçx jĩk.

<sup>37</sup> Aça' Kristo' ħma'wêçxa Davxid nçxi'k yuuxk? Davxid íiwa Kristo's we'weçxa': Adxna jxpe'jsa jĩk. Txã'wê Jesus pta'sxte', nasa txazkuéesay wala weçxana wêsê'je'tx.

*Ley kaapiya'jsawe'sxtxi yuuwesa Jesus nvxiitni  
(Mt 23.1-36; Lk 11.37-54; 20.45-47)*

<sup>38</sup> Txajũ' Jesusa' na'wê yu'kxpehnak kaapiya'j:

—Dxus ley kaapiya'jsawe'sxtxi' jxpa'yakx me'juwe. Txãawe'sxa' ropa jxu'jsa athçxatx nasatx weçxaa jxthãasna pekũju' msuuwa.

<sup>39</sup> Sa' judiuwe'sx pkhaakhenisuwa kaçxni wejx ewsaçxáanatx pakwé', vxite' sã'jĩya' pi'kxni yat-suwa txã'wêytxi yu'. <sup>40</sup> Sa' vxiudawe'sx kĩh

ji'phuni'swa jxuka kusa'jçxatx txãa pesweni's kaapeçxkana'jya' wala jxu'j we'wena lisá'. Txã'wê yũupa'ga txãawe'sxa' wejx jxthaakwe Dxus kastigãyni yuutxna jĩk.

*Vxiuda ofxreda akhni*

*(Lk 21.1-4)*

<sup>41</sup> Sa' Jesusa' dxuus yatte vxyu ãsxni dxi'pte kaçxçxa thegnak u'pu' ofxreda ãsxya' kũusatx. Aça' maaíi yu' vxyu wala ji'phsa' seena' wala

akhetx. <sup>42</sup> Naapkaçxha' teeçx u'y vxiuda puplesá kũhçxa', e'z vxyuu musxkuẽçxáak akh. <sup>43</sup> Aça' Jesusa' txãa yakh u'jusawe'sxtxi pa'yaçxa na'wẽk pta'sx:

—Naa u'y vxiuda' kĩh yuhwa ji'phmeesaçxawa maa maatewa jxthaakwek akh. <sup>44</sup> Vxite yu' akhe'tx, nawa txãawe'sx peejinimée kijx-asaçxáanatx akhe'. Nawa naa u'ya' kĩh yuhwa ji'phmeesaçxawa txajx ũ' weywa'ja's jxukak akh jĩnak pta'sx.

## 13

*Dxuus yat pçuwa'ja's Jesus pta'sxni*  
(Mt 24.1-2; Lk 21.5-6)

<sup>1</sup> Txajũ' Jesusa' dxuus yatu kasejeçte', txãa yakh u'jusa teeçxsa' na'jĩnak we'we:

—Mtheg, naa yata' na'wẽ seena' wala txaahni' kwet zhiçxkwesa yakh jĩte', <sup>2</sup> Jesus paşçxa':

—Naa yat wala's wá'ga thegu', aça' txã'wẽ yuja'. Nawa jxuka pçuuna, aça' teeçx kwetçxáa yuhwa kēese'jnimeesa yu' neeyũumeena jĩk.

*Naa kiwe pçuwa'j en ãjaçte seena'sa vxyaawa'j*  
(Mt 24.3-28; Lk 21.7-24; 17.22-24)

<sup>3</sup> Sa' txajũ kasehçxa', Oliwos thã'j dxuus yat dxi'ptek neeyũ' kxteetx u'j. Kxtee pa'jçxa Jesusa' kaççxa u'pte', Pedro, Jakobo, Juan, Adres txãawe'sxa' na'wẽtx paaçte pẽjx:

<sup>4</sup> —Bagaçx txã'wẽ dxuus yata' pçuwa'jsakx txã'sa' pta'sxwaça', sũju'tha'w. Sa' txã'wẽ yu-uwa'j en ãjãçte', ¿kĩhçxa yuuxk? txã'snatha'w jiyu wẽjẽ' jĩte', <sup>5</sup> Jesusa' pta'sxku:

—Mpa'yajkxwe kaypuba'jwe'sxte.  
 6 Txã'wēme', wala kasejtxna: Adxíi Kristoth jīna. Txã'wē yūuçxa maaíi yuutxi' wala kaypuba'jatxna.

7 Sa' i'kwe'sxa' wēsē'jene'kwe gweçxa u'pa' sa' aysuwa gweçxa pa'jana jīni's, nawa ũkhmeene'kwe. Txã'wē kxtey yuuyujuna, nawa nmeh en meea'. 8 Aça' gobierno' vxite kiwete gobierno yakh puutx puiitxna. Naapkaçxha' puutx jxu'j kiwejū pwe'sxwa puutx puiitxna. Mtee mteewa seena' ehd u'jwena. Seená' wējē enwa pa'jana. Sa' nasawa wala susutxna gobiernotx açewe'wena. Nawa pxthaa nxuswa'j en takhnaçxáa txã'wē yuuna.

9 Nawa i'kwe'sxa' jxpa'yakx meswe. Txã'wēme' judiu nthē'jsawe'sx kusete i'kwe'sxtxi dukhçxa, txãawe'sx pkhaakhenite nuypa'jçxa pkxuutxna. Sa' i'kwe'sxa' adxna selpiiya' utxaapa'ga ahçeçxa ne'jwe'sx tasxsu vxite' jxkaahsa tasxsu kuutxa'jni yuune'kwe. Txã'wē kxsū pa'jçxa', jxkaahsawe'sxtxiwa pta'sxya' ājāne'kwe adx kaapiya'jni's. 10 Nmeh en utxaaçte', Dxus yuwe ewte nvxiitwa'jsa's mtee mteewa jxuka pta'sxni yuuna.

11 Txã'wē i'kwe'sxtxi' jxkaahsa kusete dukhya' jxūna u'the', ¿ma'wē pasukxtha'w? sūhna kuh yaakxnuwe ũukhna. Dxusa' txāa dudte kaaūsuthe'jena txã'sçxáa mwe'wewe, txāa pa'gatey i'kwe'sx we'wewa'jsameei'kwe. Dxus Espiritu i'kwe'sx ũuste kaayaki'jwa'jsa' i'kwe'sx we'wewa'ja's, açá' txã'sçxáa we'wewa'jsai'kwe. 12 Naa kiwete nasa' peekx nyakhtxi ahçeçxa kiikhe'jetxna, açá' neywe'sxwa peekx nçxi'ktxi

ahçeçxa kiikhe'jetxna. Txã'wëy nçxi'kwe'sxwa neywe'stxxi ahçeçxa kiikhe'jetxna. <sup>13</sup> I'kwe'sxa' adxna selpiipa'gaçxáa naa kiwetewe'sx jxuka yaaçeni fxi'zene'kwe. Nawa uu entepkaçx Dxus yakh txutemée fxi'zeçxa', ewte neeyũune'kwe.

<sup>14</sup> Na'wë fxi'jni's jiyuya' jxpa'yakx mlëeywe: Dxus yuwe pta'sxsa Daniela' fxi'kh dxuus yatte kazx ewmée yuuna pa'jwa'ja's. Aça' txã'wë kxtey yuuçte uyçxa', Judea kiwete ũssa nasa' çxhab peeku'j yu'khsuçxaçxáa ũphna kasejene'kwe. <sup>15</sup> Aça' txã'wë seena' yuuçyã'the', êe yat-su u'psa ũphna sa'jçxawa, kîh yuhwa kutxi'jwa'j en ji'phumeetxna. <sup>16</sup> Txã'wëy mjîi ehshu u'jusawa txajx atxhçxá'swa yatuh kutxi'jya' pa'jwa'j en ji'phumeetxna. <sup>17</sup> Txãa ensu' nasa ji'phsa vxite' luuçx âpãkuë ji'phsa' wala yuh nxus pxthaa yuutxna. <sup>18</sup> I'kwe'sxa' Dxusna mpi'kxwe, txã'wë ũphwa'j ena' nus ente yuukahmén. <sup>19</sup> Txã'wëme' iiméh seena' wala nxuswa'j en yuuna. Naa kiwe's Dxus pheu'jiyna, bagaçxte yuhwa nxuswa'j en txã'wësa yu' u'pu'çme', sa' txãa skhëwniijÿyã'ja' bagaçxte yuhwa txã'wëy nxussa yu' u'pumeena. <sup>20</sup> Kwe'stxxi taki'sa Dxusa' txã'wë seena' nxuswa'j ena's txaçxmée vxitmeete yu', naa kiwete nasa kim yuhwa ïtxî neeyũumeetxna. Nawa txã'wë seena' nxuswa'j en u'puwa'ja's Dxusa' txaçxmeeek vxit txajx nasa txhitxhnisatx peeygãhçxa.

<sup>21</sup> Txajÿ' maaí yu' i'kwe'stxxi na'jïtxna: Myuhwe thegya', Kristo' ayte ũsa' jïtxna. Meeçxawa: Me'jwe thegya', Kristo' kxtee ũsa' jïtewa, i'kwe'sxa' kxtey yuunuwe.

22 Txãa ensu' wala ãsxãisa kasehçxa: Kristotha'w jĩtxna, naapkaçxha' vxite': Kwe'sxa' Dxus yuwe pta'sxsatha'w jĩna pekũjutxna, kaypuba'j wẽeçxa kĩjkĩhwa kaavxya'ja'jna. Jxpa'yakxmeete', Dxus txhitxhnisa yuhtxwa kaypuba'jatxna. 23 Aça' txã'wẽ yũuwe'sxte, adxa' dxiikhẽy pta'sxiçthi i'kwe'sx jxpa'yakx ũskahn.

*Dxus Nçxi'k Nasa Yuusãa seena' zhiçxkwe vxyaana*

*(Mt 24.29-35, 42-44; Lk 21.25-36)*

24 Nawa txã'wẽ nxusni en skhẽwniijũ', seka' çxhi'dxina, aça' a'tewa kweethmeena. 25 Naapkaçxha' estrelxa' cielujũ ũsxitxna, aça' kĩjkĩhwa seena' walasa ãe walate ũstxna txãawa jxuka kãese'jni yuutxna. 26 Txã'wẽ yũunijũ', Dxus Nçxi'k Nasa Yuusa's uyuutxna tãaph pxãhte seena' zhiçxkwe kweethna kĩaçte. 27 Sa' kĩhçxa' txajx angeleswe'sxtxi jxkaajana txajx nasa txhitxhnisa mtee mteewa ũstxna txãatx jxuka pkhakhkahn.

28 Naa ejemplo's peçxkananuwe: higwera fxtũu tasx u'se yeeçuçte uyçxa', jiyu'i'kwe yũnya'watewa. 29 Txã'wẽy na'wẽ pta'sxthi txãatx uyçxa', jii mfxi'zewe nmeh ena' utxaaçna sũhna. 30 Isath we'we': txã'wẽ seena' nxuswa'j ena's uyuutxna naa ensu nasa uumey. 31 Cielu naa kiwe jxuka skhẽuutxna, nawa adx we'weni' jxuka kxtey yuumey yu' skhẽwmeetxna. 32 Nawa txã'wẽ Dxus Nçxi'k kĩh orate kũiwa'jsatewa, txãa en yu'sa' kim yuhwa jiimeeta' cielute Dxus angeleswe'sxwa jiimeeta',

aça' Dxus Nçxi'k ïi yuhwa jiime', naasáa Dxus yuuçxáa jiia'.

<sup>33</sup> Txãa pa'ga i'kwe'sxa' wala jxpa'yakx meswe, Dxusna yuuçxáa neewe'wena. Txã'wëme' jiimeei'kwe bagaçx kïiwa'jsatewa. <sup>34</sup> Txã' na'wë yuuna: Teeçx piçthë'j jxu'j kiwen u'jweççxa', yatu kasehmey selpisaatx teeçxsa na'wëçxah mjïi üsçxa kxtee jxpa'yakx üskahn teeçx thegwa'jsa txajana. <sup>35</sup> Txã'wëy i'kwe'sxwa wala jxpa'yakx meswe. Txã'wëme' jiimeei'kwe çxhi'dxiçte ma'k yuu, meeçxa' kuspaxh atalx we'weçte ma'k yuu, meeçxa' kusii ma'k yuu nawa pa'jçxáa yuuna. <sup>36</sup> Txã'wëme' ya-jkxmée üsiyna, naa dudte pa'jçxáa wáa yuuna. <sup>37</sup> I'kwe'sxçxáatx pta'sxmée, jxukaysatxthu pta'sxi' jxpa'yakx üskahn.

## 14

*Jesusa's ikhwa'ja's puutx we'weni*  
(Mt 26.1-5; Lk 22.1-2; Jn 11.45-53)

<sup>1</sup> Paskua's ü'ni vxite' pan lewadura ji'phmée ü'ni fxiesta txãa e'z fxiesta äjxa' e'z ençxáak peejx yu'. Txãa ente Dxus leya's kaapiya'jsawe'sx vxite' sacerdote npiiçthë'jwe'sxa' puutx we'wetx ma'wë yüuçxa kimwa jiyunimeete Jesusa's ki-ikhe'jya' äjãwa'ja's. <sup>2</sup> —Nawa fxiesta entemée kiikhe'je'nja'w. Txã'wëme', nasa wala susutxna jïnatx puutx we'we.

*Wët putasá pa'gasa's teeçx u'y Jesus dxikthekhë awni*  
(Mt 26.6-13; Jn 12.1-8)

<sup>3</sup> Naapkaçxha' Jesusa' Betaniate Simon wã'jy weeju katxhisa yattek u'p yu'. Aça' kxtee u'pte', teeçx u'y wēt putasá kīh yuhwa ka'dnimeesa wala pa'gasa's atçxak kūh. Sa' fxrasko's uhdçxa Jesus dxikthekhēk aw. <sup>4</sup> Aça' kxtee ūssa' maafi yu' ūusaçxatx txāawe'sx pwe'sx na'jīna:

—¿Kīh yūupa'gaçxáaga naa wēt putasá tx-akwe pa'gasa's kxul psuwú'? <sup>5</sup> Wejx yuuwa trescientos pesote txweyçxa puupletx pu'çxya' ewne' yu' jīnatx txāa u'ya's ahçena wēesxū.

<sup>6</sup> Aça' Jesusa' na'jīnak we'we:

—¿Kījxa'kwe wēesxú'? Kuçx yuunuwe. Na'wē yūuk txā' kxul vxituni yuume'. <sup>7</sup> Puupletx peeswaç ewne' yu' jī'i'kwe na' puuplesatxi' багаçxtewa peesya' ājāne'kwe, i'kwe'sx yakh nes yuutxna naa pa'ga. Nawa adxa' i'kwe'sx yakh nes yuuya'wameeth. <sup>8</sup> Adx uute adx kakwete sxūsxwa'ja's ma'wēçxáawa yūuk adx uumeyna. <sup>9</sup> Isath we'we', naa kiwete mtee mteewa Dxus yuwe's pta'sxna pekūhsa', naa u'y txā'wē yūuni'swa ja'da pta'sxni yuuna peçxkanamée jīk.

*Jesusa's preesu'jwa'ja's Judas dukhya' neeyūuni  
(Mt 26.14-16; Lk 22.3-6)*

<sup>10</sup> Txajū' txāa yakh u'jusa teeçxsa Judas Iskariote' sacerdote npiiçthē'jwe'sx kusete Jesusa's dukhya' puutx we'weya' u'kh. <sup>11</sup> Aça' txāawe'sxa' wala weçxana vxyu dukhya' neeyūutx. Txajū' Judasa' ¿ma'wē yūuçxa Jesusa's acesawe'sx kusete dukheki'th? sūhna wala yajkxku.

*Jesusa' docesawe'sx yakh nmeh ũ'ni*  
(Mt 26.17-29; Lk 22.7-23; Jn 13.21-30; 1 Ko 11.23-26)

<sup>12</sup> Pan lewadura ji'phmée ũ'ni fxiesta en ãjãçte', Paskua'jwa'j piisxaatx ikhe' txãa ente' txãa yakh u'jusawe'sxa' Jesusa's pějxtxi:

—¿Paskuatewe'sxa's ũ'ya' mtee pheu'jya' kaa-jxa'waga? jĩte', <sup>13</sup> txãa yakh u'jusawe'sx e'zsatx na'wěk jxkaah:

—Me'jwe Jerusalenna. Sa' kxtee teeçx piçthě'j uyuune'kwe yu' mitxha's yakhçxa u'jweçte. Sa' e'stey u'jwene'kwe, <sup>14</sup> aça' txãa mtee u'kate', i'kwe'sxwa kxtee u'kaçxa yat namu's pěyine'kwe: ¿Mtee piesa ũsuki'g Paskuatewe'sxa's pheu'jçxa adx yakh u'jusawe'sx yakh ũ'wa'ja's? jĩnak kwe'sxtxi jxpe'jsa' yuwe kaah jĩne'kwe. <sup>15</sup> Aça' txã' pta'sxina ěe yatte teeçx piesa walasa pheu'jniyã'jsa. Kxtee Paskuate ũ'wa'ja's pheu'june'kwe.

<sup>16</sup> Txã'wě jxkaathe', txãawe'sxa' çxhabna u'jçxa' Jesus ma'wě jxkaahni's jxuka kxtey uyçxa', Paskuate ũ'wa'ja's pheu'jtx.

<sup>17</sup> Jxuka çxhi'dxiçte', Jesuswa kxtee pa'kh txãa yakh u'jusawe'sx yakh. <sup>18</sup> Sa' mesate ũ'na u'pçxa', na'jĩk:

—Isath we'we', ayte adx yakh ũ'na u'psa teeçxsa' adxa's açasawe'sx kusete dukhya'wa' jĩte', <sup>19</sup> jxukaysa nxus we'wena puutx ya'paapěyĩ'tx:

—Meeçxa' ¿adx wáa txã'wě açasawe'sx kusete dukhwa'jsane'tka? jĩnatx jxukaysa txã'wěçxaçxáa we'we'.

<sup>20</sup> Aça' Jesusa' pta'sxku:



—Adx yakh u'jusa teeçxa' maa txã'wě adx yakh ja'daçxah kuse's plaatukhě akhena txãa adxa's açasawe'sx kusete dukhwa'jsa'. <sup>21</sup> Dxus Nçxi'k Nasa Yuusa' ma'wě uuwa'jsatewa Dxus librute pta'sxi'k txã'sa' kxtey yuuyujuna. Nawa adxa's açasawe'sx kusete dukhsa' seena' yuh nxuste khějena. Txãa piçthě'ja' wejx yuuwa naa kiwete kasehmeewaçne' wejx ew yu' jĩnak we'we.

<sup>22</sup> Nee ũ'na u'píi, Jesusa' pana's jxpa'gaçxa Dxusna weçxana'wa pe'ltedeçxa ũsu'sku na'jĩna:

—Mě'we, naa pana' adx kakwe na'wěsa' jĩçxa', <sup>23</sup> waso'swa jxpa'gaçxa Dxusna weçxana'wa jxukaysatx tudxkaathe', jxukaysa tudtxi txãa wasotewe'sxa's. <sup>24</sup> Aça' Jesusa' na'wěk we'we:

—Naa wasotewe'sxa' adx ee na'wěsa', maazkuéesatewa ãh uwuwa'jsa'. Dxusa' txã'wěk adx eea's pkawçxa yuuçxáa i'kwe'sxtxi nwe'wewa'ja's nvxiht u'se pheu'jçxa. <sup>25</sup> Isath we'we': ãçxhũyã'ja' peena yu' tudxme'nja naa uwa yu'a's, naasáa Dxus jxkaahwa'j ente yuuçxáa ki' tudxi'nja.

*Pedro ĩsxiiwa'ja's Jesus pta'sxni*

*(Mt 26.30-35; Lk 22.31-34; Jn 13.36-38)*

<sup>26</sup> Txajũ' Dxusna weçxana memçxa', Oliwos vxiçna u'jtx.

<sup>27</sup> Kxtee pa'jçxa', Jesusa' na'wěk pta'sx:

—Dxus librute we'weçxa': piisxáa-thegsa's ikhte', piisxá' jxuka ũphuutxna jĩ'k txãa pa'ga naa kuste' i'kwe'sxa' adx tasxu jxuka ũphuune'kwe. <sup>28</sup> Txã'wě yuutewa, adxa' ki' ĩtxĩ

yuuçxa i'kwe'sx yaçte u'jwe'nja Galilean jïte',  
<sup>29</sup> Pedro paşçxa':

—Vxite yu' makwe ũukhçxa ũphtewa, adx yu' txã'wē yūume'nja jïk. <sup>30</sup> Aça' Jesusa' na'wēk pta'sx:

—Idxa's isath we'we', naa kuste atalx e'z us we'wemeyna, tekh us ĩsxĩijaç yuune'ga adxa's jiimeeth jïna. <sup>31</sup> Txã'jïtewa, Pedro' jweeĩçxáak çxhãçxha we'we':

—Makwe idx yakh ih uune'jçxawa, idxa's jiimeeth jïna yu' ĩsxĩime'nja jïte', jxukaysa txã'wēçxaçxáatx we'we.

*Jesusa' Geçemanite Dxus yakh puutx we'weni  
 (Mt 26.36-46; Lk 22.39-46)*

<sup>32</sup> Txajũ' teeçx ahte pa'jtx, Geçemaní yaasesate. Sa' Jesusa' txãa yakh u'jusawe'sxtxi:

—Ayte me'pwe, naapkaçxha' adxa' Dxus yakh puutx we'weya' u'jweçthu jïçxa', <sup>33</sup> Pedro, Jakobo, Juan txãawe'sxçxáatx pe'jçxa u'kh. Txajũ' Jesusa' wala nxus yajkxçxa', <sup>34</sup> na'jïnak pta'sx:

—Txakwe wala pxthaa yuuçxa uuwa'ja's yajkxte', wala nxus yuja'. Aça' i'kwe'sxa' ayte dehmée me'pwe jïçxa', <sup>35</sup> jxu'jmeekuē u'jçxa kiwega pkipha weteçxa Dxusna pējxku txã'wē seena' yuuçxa uuwa'ja's yu'pthejkahn na'jïna: <sup>36</sup> Tata, idx yakha' kïh yuhwa thēysa yu' meea'. Aça' txã'wē seena' nxuste uuwa'jũ meen nwe'we. Nawa adx jxthāasni's kxtey yuumeeçxawa, iidx jxthāasniçxá's kxtey meen yūu jïk.

<sup>37</sup> Txajũ' Jesusa' txãa tekhsatx thegya' kũhçxa', dehna ũstek uy. Sa' Pedro's we'wek:

—Dehmée u'pkaathe', ¿teeçx oraçxáawa ìtxĩ u'pmée dehwa'ga? <sup>38</sup> Ewmeete weteya'mée, Dxus yakh puutx we'wena me'pwe dehmée. I'kwe'sxa' ũusuh yu' çxhãçxhai'kwe yaaki', nawa kakwe yu' çxhãçxhaçme' kxtey yuuya'.

<sup>39</sup> Txajũ' ki'kin Jesusa' u'jçxa', txã'wëyçxáak we'wena Dxus yakh puutx we'we'. <sup>40</sup> Sa' thegya' ki' sxawedçxa', txã'wëy deeni ũstek uyna kũh, txãawe'sx yafxa' dee wëeçxa çxhãçxhaçmeene'ta naa pa'ga. Txã'wë Jesus uyna kũhte, ma'wë pasya' yuhwa ãjã'çmeeta'.

<sup>41</sup> Txajũ' tekh uswa txãawe'sxtxi thegna kũhçxa', Jesusa' na'jĩk:

—Ãçxh yuuçxá' jxkaaseya' mdejxujíiwe. Nawa ãçxha' pejka en ãjk, Dxus Nçxi'k Nasa Yuusa's ewmeesawe'sx kusete dukhwa'j. <sup>42</sup> Txã'wëyã'ja' aç'a kiiteçxa mejkawe. Adxa's açesawe'sx kusete dukhwa'jsa' yujxã'ja' jĩk.

### *Jesusa's preesu'jni*

*(Mt 26.47-56; Lk 22.47-53; Jn 18.2-11)*

<sup>43</sup> Kxtee we'wena nee ũsiyna, Judasa' kũjk. Txãa yu' Jesus yakh u'jusa docesatewe'sxíçxáak yu', aç'a txãa Judas yakh nasa wala kũhtx kçxilx fxtũ txã'wë atçxa. Txãawe'sx yu' Dxus leya's kaapiya'jsawe'sx vxite' sacerdote npiiçthë'jwe'sx vxite' judiu nthë'jsawe'sx jxkaahnitx yu'.

<sup>44</sup> Judasa' Jesusna uwewa'jsatx na'wëku'ga yu'kxwe'weçxa pe'jna yuwé': Ma'sna dxi'pte weçxa'nja txã'sna i'kwe'sxa' tudçxa jxũna u'jwene'kwe jĩnaga yu'kxwe'we.

<sup>45</sup> Txajũ' Jesus tasxte utxaana kũhçxa':

—Kwe'sxtxi jxpe'jsa jĩçxa weçxak.  
 46 Naapkaçxha' nasa' Jesusa's tudtxi jxũna u'jya'.

47 Txã'wẽ Jesusa's tuduçte', Jesus yakh u'jusa teeçxsa' kçxilxa's jxkuutxi'jçxa sacerdote npiiçthẽ'jna selpisáa thũ'wẽ's spẽ'thku.

48-49 Txajũ' Jesusa' nasatxi' na'jĩk:

—Adxa' een isath dxuus yatte kaapiya'jna ũsu' i'kwe'sx ksxavxyte. Nawa txagaçxhíi yu' tudmeeçxa', ãçxh yu' peswéethasi'kwe kçxilx petx fxtũ atçxa pa'j, tudçxa jxũna u'jya'. Nawa Dxus libroute fxi'jni ũsa' txãa kxtey yuukahn txã'wẽ yuuça' jĩnak we'we.

50 Txajũ' Jesus yakh u'jusawe'sxa' txã'sçxáana nvxihtçxa jxuka ũphna u'jtx.

### *Teeçx piçtakx iyuna u'jni*

51 Naapkaçxha' teeçx piçtakx dee pa'çxni yakhçxáak Jesus e'stey u'jweç yu', aça' txã'snawa tuduçtxi yu'. 52 Nawa dee pa'çxni's nvxihtçxa, iyuna u'kh sũpxçxáa.

*Judiu nthẽ'jsawe'sx tasxte Jesusa's kuutxa'jni*  
 (Mt 26.57-68; Lk 22.54-55, 63-71; Jn 18.12-14, 19-24)

53 Txajũ' Jesusa's sacerdote npiiçthẽ'j tasxte nuypa'jtx. Aça' kxte' sacerdotewe'sx, judiu nthẽ'jsawe'sx Dxus leya's kaapiya'jsawe'sx jxukay pkhaakhetx. 54 Aça' Pedro' Jesus e'ste jxu'kh neeyũuna u'jna ũsu', sacerdote npiiçthẽ'j yat patxute pa'phkaçx. Sa' patxute neeyũuk policiawe'sx yakh ipx bajçxna. 55 Naapkaçxha' sacerdotewe'sx vxite' judiu nthẽ'jsawe'sx jxukay pkhaakheçxa, Jesus ewmée yũuni's pakwetx, ewmée yũuni's kpajkçxna kiikhe'jya' sũhçxa.

Nawa uymeeta'. <sup>56</sup> Txã'wě uymeetewa maafi yu': Jesusa' yuwesa yuja' jina yuwe ũsu'tx. Nawa txãawe'sx pta'sxni' isamée fxiyfxiyçxáak kaseje'. <sup>57</sup> Txã'wětewa maafi yu' na'wěttx we'weya' yajkx:

<sup>58</sup> —Jesus we'weçxa': Naa dxuus yat nasaa txaahni's pěttxçxa, tekh ente' ki' vxite tx-aja'nja nasa vxitnimeesa jina we'weni's kwe'sxa' iiwēsē'tha'w jinatx pāatxhī'khe'.

<sup>59</sup> Makwe txã'wě we'wetewa, txãawa isamée iičxáak kaseje'.

<sup>60</sup> Txajū' sacerdote npiiçthē'ja' kiiteçxa', Jesusa's na'wěk we'we:

—Na'wěttx pāatxhī'khe' ¿txã'sa' ma'wěçxáawa pasya'wameegá? Meeçxa' ¿isa yuh txã'jīwá'nta? jítewa, <sup>61</sup> Jesusa' teeçx yuweçxáa yuhwa pasme'. Aça' sacerdote npiiçthē'ja' ki'kin pějxku:

—¿Idxa' Kristo, Dxus Nçxi'k dxihgá? jíte', <sup>62</sup> Jesus pasçxa':

—Txã'wěiith. Aça' i'kwe'sxa' uyuune'kwe Dxus Nçxi'k Nasa Yuusa' Dxus pukate kaççxa u'pte. Sa' cieluju tāaphte kijaçtewa uyuune'kwe jik.

<sup>63</sup> Txajū' sacerdote npiiçthē'ja' peekx athni ropa's ũsçxa sudeçxa na'wěk we'we:

—¿Kijxa'çxáa testigo jwee pejiikxtha'w? <sup>64</sup> I'kwe'sx wēsē'jna ũste na'wěk Dxusa's açewe'we. Aça' i'kwe'sxa' ¿maa sūjū'kwe? jíte', jxukaysa pasçxa':

—Txã'sa' ikhteçxáa ewna jíttx.

<sup>65</sup> Txajū' vxite yu' dxi'pte fxne'sx avxythethna dxi'pa's aphçxatx uka'kana na'jī':

—Mjiyu wakx ¿kimga idxa's uka'ka'? j̄inatx npeevxysxika'. Aça' policiawe'sxwa txã'wēytxi dxi'pte uka'ka'.

*Jesusa's jiimeeth j̄ina Pedro we'weni*

*(Mt 26.69-75; Lk 22.56-62; Jn 18.15-18, 25-29)*

<sup>66</sup> Pedro' patxute ũste', teeçx u'y sacerdote npiiçthē'ja's selpisáa kũhçxa', <sup>67</sup> Pedro's uyku txã'wē ipx bajçxna u'pte. Sa' dxi'pte ew thegçxa, na'j̄inak we'we:

—Idxwa Nasarethuwe'sx Jesus yakh u'jusag j̄ite', <sup>68</sup> Pedro' ĩsxĩik:

—Adxa' txã'sa' jiimeeth kimnane'kwe we'we na'swa j̄içxa', kasehna u'jçxa ekajuk ũsu'. Naapkaçxha' atalx we'wek. <sup>69</sup> Aça' txãa u'ya' Pedro's ki' uyçxa' kxtee ũssatxi' na'j̄inak pta'sx:

—Naa piçthē'ja' pejka Jesus yakh yuh u'jusa' j̄inak we'we. <sup>70</sup> Nawa Pedro yu' ki'kin ĩsxĩik. Aça' txãa e'su' kxtee ũssawa Pedro's na'j̄inatx we'we:

—Isa, idxa' txãa yakh yuh u'jusag. Galileajuwe'sxçxa íig txãjũ nasa na'wē we'we' j̄ite', <sup>71</sup> Pedro' ũusçxa we'wena jurãyku:

—Isa Dexus uyte, i'kwe'sx kxsusu'i'kwe txãa piçthē'ja's jiimeeth j̄içpkaçxha', <sup>72</sup> atalxa' e'z us we'wek. Txajũ' Pedro' Jesus we'weni's yajkxku: Atalx e'z us we'wemeyna, idxa' tekh us ĩsxĩijaç yã'j yuune'ga adxa's jiimeeth j̄ini's. Aça' Jesus we'weni kxtey yuute', Pedro' wala ũ'nek.

## 15

*Jesusa's Pilato kusete dukhni*

*(Mt 27.1-2, 11-14; Lk 23.1-5; Jn 18.28-38)*

1 Txajũ' khikhyna sējēçte', sacerdotewe'sx judiu nthē'jsawe'sx, Dxus leya's kaapiya'jsawe'sx yā'jçxa walasa pwe'sx pkhaakheçxa Jesusa's tudçxa jxūna u'jtx Pilato tasxte kuutxa'jya'. 2 Aça' Pilato' Jesusa's na'jīnak pējx:

—¿Idx wáa judiuwe'sxtxi jxkaahsane'ga? jīte', Jesusa' pasku:

—Txã'wē íith. Isa yuh we'weg jīk.

3 Txajũ' sacerdotewe'sxa' Jesusa' kīhtewa jxuka ewmeesa' jīnatx yuwe ũsu'. 4 Aça' Pilato' ki' we'wek Jesusa's:

—Mwēesē'j, idxa's na'wētx kīhtewa jxuka ewmeesa' jīna yuwe ũsu', aça' ¿ma'wēçxáawa pasya'wameegá'? jīte', 5 Jesusa' teeçx yuweçxáa yuhwa we'weme', aça' Pilato' kujk yajkxna neeyūu.

### *Jesusa's ikhwa'j vxitni*

*(Mt 27.15-31; Lk 23.13-25; Jn 18.38-19.16)*

6 Pilato' Paskua fxiesta iisa teeçx preesu txhweete'k nasaa pēyni's. 7 Txãa ensu' kxte preesu ũsu'k Barabás yaasesa. Txãa piçthē'ja' vxite nasa yakh pkhaakheçxa gobierno yakh puí kiisçxa nasatx wala kiikhe'jsa npiiçthē'kh yu'. Txãa pa'gak preesu ũsu'. 8 Txajũ' kxtee nasa pa'jsa', Pilato's pējxtxi fxiesta iisa ma'wēne' yū' txã'sa' āçxwa txã'wēy yūukahn. 9 Aça' Pilato' pējxku:

—I'kwe'sxa' ¿judiuwe'sxtxi jxkaahsa'skwe txhweete jxthāasu'á'? jīk. 10 Nawa Pilato yu' sacerdote ne'jwe'sxa' Jesusa's ahççxa

dukhtewa jiiçxak txã'wě we'we. <sup>11</sup> Nawa sacerdotewe'sxa' nasa jxukaysatx yu'kxwe'wetx, wejxwa Barabasma mitxhwete jĩkahn. <sup>12</sup> Aça' Pilato' pějxku:

—I'kwe'sx we'weçxa', Judiuwe'sxtxi Jxkaahsa jĩ'i'kwe çtxã'sa' kĩjkwe yũu jxthãasu'? jĩte',  
<sup>13</sup> txãawe'sx sus we'wena paçxa':

—Txã'sa' kluuskhě mkaafxuçu'j jĩtx.

<sup>14</sup> Txajũ' Pilato' pějxku:

—Txã'wě yũukahna' naa piçthě'ja' çkĩhga ewmée yũu? jĩtewa, txãawe'sx yu':

—Kluuskhě mkaafxuçu'j jĩnaçxáatx sus we'we'.

<sup>15</sup> Aça' Pilato' nasa yakh ew neeyũu wěeçxa, Barabasa's txhweetekaakh, sa' Jesus yu'sa' kaapeçxukwe'jçxa kluuskhě fxuçkahn dukhku.

<sup>16</sup> Txajũ' soldauwe'sxa' Jesusa's jxũna u'jtx txãawe'sx ũsni patxute. Sa' soldauwe'sx jxukaysatx kxteeçxaçxáatx pa'ya. <sup>17</sup> Khĩçxatx Jesusa's jxkaahsa ropa na'wěsa kaapã'çxi'jçxa, dxikthete yu' çhũçh korona vxitçxa kaafxĩkhe'j.

<sup>18</sup> Txajũ' na'wě sus weyna:

—Judiuwe'sxtxi jxkaahsath jĩ'ne'ga jĩnatx weeçx we'we.

<sup>19</sup> Sa' dxikthega fxtũu zuzsaju pekwe'kwena, fxne'sx avxythethnatx txajx tasxte peejxũkwe'.

<sup>20</sup> Txã'wě yũuna jxã'jçxa', jxkaahsa ropa na'wěsa's ksũupi'jçxa, txajx ropa's ki' kaathe'jtx. Txã'wě yũuçxatx kluuskhě fxuçya' jxũna u'j.

*Jesusa's kluuste fxuçni*

*(Mt 27.32-44; Lk 23.26-43; Jn 19.17-27)*



21 Aça' çxhabu kasehna u'jweçte', teeçx piçthê'j Simon yaasesa's puutx uyçxa soldauwe'sxa' txã'snatx Jesus yakhni kluusa's kx-aakhe'jçxa pe'jna u'j. Txãa Simon yu' Alejandro Ruxowe'sx neyku yu', Cirene kiwetewe'sx.

22 Txajũ' Jesusa's teeçx ahte Golgota yaas-esatetx pe'jna u'j. Txãa Golgota yu' Uusáa Dxikthé Dxi'thçxáasa jĩni'. 23 Kxtee pa'jçxa', vxinote yaasa ka'daçxatx yus wêe, nawa Jesusa' tudxme'.

24 Txajũ' kluuskhê fxuççxa', soldauwe'sxa' Jesus ropatxi's txudeedeçxa swerte kaahtx txajx kaaçni atxha's maa soldau knaytewa jiyuya'.

25 Kusíi las nwewetetx Jesusa's kluuskhê fxuç. 26 Sa' kĩh yũusate txã'wê kluuskhê fxuççxawa pta'sxna fxi'jçxa ki'ptxi kluus vxixte: Judi-uwe'sxtxi Jxkaahsa' jĩna. 27 E'z nasa seena' yuuwesa yu'tx txãawe'sx yakhtxi Jesusa's pdxi'p kluuskhê fxuç. 28 Aça' Dxus librute fxi'jni' kxtey yuuk: Nasa ewmeesathas yuuwesa yakhku ki'pni yuu jĩna fxi'jni'.

29 Txajũ' kluus tasxuy uykhêwsa' dxikthetx kaawũhnatx weeçx we'we':

—Dxuus yata's idxa' pētxçxa tekh ente' ki' kiisu'nja ¿jĩ'çmeegá'? 30 Txã'wê ajāwa'jsaçxa' ¿mjĩitega kluusuh peekii iyuçxa sa'ja'çmée? jĩ'tx. 31 Aça' Dxus leya's kaapiya'jsawe'sx, vxite' sacerdotewe'sxwa na'jĩnatx weeçx we'we':

—Vxite yuutxi' nwe'weçxawa, peekii yu' ya'nwe'weya' ajā'çme'. 32 Israelwe'sxtxi jxkaahsa Kristoth jĩ'k na' txã'wê dxihçxa', açxhíi kwe'sx uyna ũste kluusuh sa'jana aç yuuçxáa txã'wê dxih yu'ga sũjũ'nja'w jĩ'tx. Txã'wēy txãa

yakh kluuskhẽ fxuçni u'psawe'sxwa Jesusa's wëesxu'tx.

*Jesus uunii*

(Mt 27.45-56; Lk 23.44-49; Jn 19.28-30)

<sup>33</sup> Txajũ' ěepxãh wala ãanite', naa kiwete jxuka çxhi'dxku kusuçte las trestepkaçx.

<sup>34</sup> Txã'wẽ çxhi'dxni las tres ãjãçpkaçxha', Jesusa' na'jĩnak sus we'we:

—Eloi, Eloi çlama sabaktani? jĩk. Txã': Adx Dxusgu sa' çmjĩi pa'gaga adxçxáana nvxiht? jĩni'.

<sup>35</sup> Aça' nasa kxtee wësẽ'jna ũssa' Eliasa's pa'yaça' jĩtx. <sup>36</sup> Naapkaçxha' teeçxsa' wuwuuna u'jçxa, vxino pussate esponja's akhçxa fxtũute açhçxa Jesus yuwete utxak çxazxakahn. Sa' na'jĩk:

—Sxuuna' theгна meswe, aan Eliasa' kluusuh spajkxya' pa'jana jĩk.

<sup>37</sup> Txajũ' Jesusa' ki'kin sus we'wenitee uuna kãjk. <sup>38</sup> Naapkaçxha' dxuus yatte txudenisa liensu pesath a'kxnisa' peekxçxáa sutek pu-upxãjkhẽ kute ěeju kiwete kĩh. <sup>39</sup> Aça' kluus dxi'pte ũssa soldau kpiitana' Jesus txã'wẽ sus we'weçxa uuçte uyçxa', na'wẽk we'we:

—Naa piçthẽ'ja' isa Dxus Nçxi'k yuh yu'ga jĩk.

<sup>40</sup> Txã'wẽy u'ywe'sxwa jxu'ju theгна ũsu'tx. Aça' txãawe'sx ksxavxyte', Salomé, vxite' Maria Magdalena vxite' Maria Jakobo Josewe'sx nji'j txãawe'stxi yu'. (Txãa Jakobo's nuuçxsa' ji'tx).

<sup>41</sup> Naa tekx u'ysa' Jesusa's selpiina u'jusatx yu' Galilea kiwesu. Nawa txãawe'sxçxáamée, vxite u'ywe'sxwa Jesus yakh ih Jerusamente pa'jsatx ũsu'.

*Jesusa's pedani**(Mt 27.57-61; Lk 23.50-56; Jn 19.38-42)*

<sup>42</sup> Jxkaasewa'j en ãjãçte', kîhnawa jxuka pheu'jçxatx nvxiitu'. <sup>43</sup> Txãa pa'gak kusuçte' José Arimateajũwe'sxa' Pilato tasxte ûukhmée utxáa Jesus kakwe's pějxya'. Txãa José yu' judiu ne'jwe'sxsa íçxáak yu', sa' Dxus jxkaahwa'j ena' dud ãhwaça' sũhna yaakxsak yu'. <sup>44</sup> Txã'wě Jesusa' uuyã'kh jĩni's jiyuçxa', Pilato' wala kuh yajkxçxa soldau kpiitana's pa'yak pějxya' txã'wě Jesus uudxihtewa jiyuya'. <sup>45</sup> Txajũ' kpiitana': Jesusa' uuyã'kh jĩna pta'sxte', Pilato' Jesus kakwe's jxũna u'khaakh. <sup>46</sup> Aça' Josea' Jesus kakwe's spajkxçxa, liensu fxinusa weyçxa kxteek yap. Sa' jxũna u'jçxa kwet kafx u'se phadenisa ji'phuk txkaa khikhçxa, u'kani kafxte yu' kwet walasajuk aph. <sup>47</sup> Txã'wě yũuçte', Maria Magdalena vxite Maria José njĩ'j txãawe'sxa' Jesus kakwe's mkaa khikheçtewa uytxi.

**16***Jesus ki' itxi yuuni**(Mt 28.1-10; Lk 24.1-12; Jn 20.1-10)*

<sup>1</sup> Txajũ' jxkaase en skhẽwniite', Maria Magdalena vxite' Maria Jakobo njĩ'j, vxite' Salomé txãawe'sxa' wět putasá weytxi Jesus kakwete sxũsxya' u'jya'.

<sup>2</sup> Txajũ' kuskuskhẽ wala kusíi u'jtx, sa' sek kãjaçte' pedaní kafxte pa'jtx. <sup>3</sup> Sa' kxtee pa'jaççxa', na'jĩnatx txãawe'sx pwe'sx we'we':

—¿Kim pedaní kafxte apnisa kwet wala's ki-isukx? jĩ'tx. <sup>4</sup> Txajũ' pedaní kafxte thegçxa', apnisa kwet wala' kiisçxa pukate ki'pni u'ptetx uy. <sup>5</sup> Aça' pedaní kafxte u'kaçxa', teeçx piçtakx ropa çxihmesa jxu'jsa athçxa paçu ju'gu kaçxçxa u'pte uyçxa', wala ùukhtxi. <sup>6</sup> Nawa txãa piçtakxa' na'wêk pta'sx:

—Ûukhnuwe. I'kwe'sxa' Jesus Nasarethuwe'sxa's kluuskhê fxuçni uuk txã'snai'kwe pakwé'. Nawa txã' ìtxĩ yuuyã'kh, txãasa ayga meeyã'ja'. Aça' khikhniga mthegwe wakx, kîhwa meea' jĩçxa' kaakh na'jĩna: <sup>7</sup> Txãa yakh u'jusawe'sx vxite' Pedro txãawe'sxtxi na'jĩne'kwe: Jesusa' i'kwe'sx yaçte u'jweça' Galilean, aça' kxtee txã'sa' uyuune'kwe ma'wêga uumeywa pta'sx txã'sa' kxtey yuuna jĩkaathe', <sup>8</sup> txãawe'sxa' pedaní kafxu wala ùukhna ùphna u'jçxa, kuh yaakxnite vxitesa yuutxi' dxi'the kim yuhtxwa pta'sxmeetx u'j.

*Maria Magdalena's Jesus vxyaani*  
(Jn 20.11-18)

<sup>9</sup> Txã'wê jxkaase en skhēwnijũ' Jesusa' ki' ìtxĩ yuuçxa', Maria Magdalena khuê'yna vxyaak, na'wê siete eçx luuku vxit-satx kutxi'kh txã'sna. <sup>10</sup> Aça' txãa u'ya' Jesus yakh u'jusawe'sx tasxna u'jçxa, pta'sxku. Txãawe'sxa' nxusçxa ù'nenatx u'p yu'. <sup>11</sup> Sa' Jesusa' ìtxĩ yuuga aça' ù'kwe' uythu jĩna pta'sxtewa, weh yuhwa txã'wê yũune' sũjũ'çmeeta' txãawe'sxa'.

*Jesus fxiy yuuçxa vxyaani*  
(Lk 24.13-35)

12 Txãa entey Jesusa' ki' vxyaak fxiy yuuçxa, txãa yakh u'jusawe'sx e'zsa dxi'the u'jweçte.  
 13 Aça' txãawe'sxwa ki' sxawedçxa, Jesusa's txã'wē uytha'w jīna vxitetx pta'sxtewa, txã'wē uyne'ta sūjū'çmeeta'.

*Jesusa' txãa yakh u'jusawe'sxtxi neewe'weçxa nvxiitni*

*(Mt 28.16-20; Lk 24.36-49; Jn 20.19-23)*

14 Txã'wē pta'sxna jxã'jaçpkaçxha', txãa yakh u'jusa oncesa mesate kaçxçxa u'pte ki' vxyaaçxa', na'jīk:

—¿Kīh yuuçxakwe adxa'sa' ki' ītxī yuune' sūjū'çmée? Adx pta'sxni's ūuste yu'akhya' ājā'çmeei'kwe, sa' ītxī yuute uysāa pta'sxtewa txã'wē uyne'ta sūjū'çmeei'kwe.

15 Txajū' na'jīnak jxkaah:

—Me'jwe, Dxus yuwe's pta'sxya' nasa jxukaysatx maa kiwete mteewa jxuka. 16 Aça' maawa adxa's ūusuh jxuka yajxna jxpa'gaçxa yu'te ya'bautisaīna txã' nwe'weni yuuna. Nawa adxa's ūusuh jxuka yajxna jxpa'gasame' Dxus kastigo's knayuuna. 17 Adxa's ūusuh jxuka yajxna jxpa'gasa' na'wē yūuya' ājātxna: Adx pu'çxte', eçx luuku vxit-satxwa nasaa ūusuh kutxi'jixna. Sa' yuwe fxiysajuwa we'wextna. 18 Ul wesweetxwa kuseju uweetxna. Sa' makwe weneno's tudxtewa, kīh yuhwa kãaçã'jmeena kakwete. Sa' açã'sa kakwete peekiizeçxa, Dxus yakh puutx we'wete', katxhitxna jīk.

*Jesus cielun u'jni*  
*(Lk 24.50-53)*

19 Txã'wě yu'kxpehni e'su', kwe'sxtxi jxpe'jsa Jesusa' cielun pe'jna u'jni yuuçxa, Dxus pukate kaçxku paçu ju'gte. 20 Aça' txãa yakh u'jusawe'sxa' u'jçxa', Dxus yuwe's mtee mteewa pta'sxtxi. Txã'wě kwe'sxtxi jxpe'jsa pu'çxte', kījkiñ yūuya'wa ya'ājāk, txãa pa'gatx txajx we'weni' isasa yuhna sūhwa'ja's ji'phu'.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

06da09f4-8d0f-5001-ae8c-0e6aa0131ffd